

यहुन्ना

बचनु देहधारी भवा

1सुरू म बचनु रहई, अउर वचनु परमेसुर केर साथै रहइ, अउर वचनइ परमेसुर रहइ। ²यहइ सुरू म परमेसुर के साथे रहा।

³सबहि कुल्लु वहिते पइदा भवा अउर जउनु कुल्लु पइदा भवा वहिमा कउनउ चीज वहिके बिना पइदा नाही भई। ⁴वहिमा जीवनु रहइ अउर ऊ जीवनु मनईन केर जोति रहइ। ⁵अउर जोति अँधेरइ म चमकति हइ, अउर अन्धकार वहिका गरहन नाहि किहिस।

⁶एकु मनई परमेसुर के ओर ते आइ परगट भवा जेहिका नामु यहुन्ना रहा। ⁷ऊ गवाही दिये खातिन आवा कि जोति केर गवाही देय जेहिते सब वहिके जरए बिस्वासु लावैँ ⁸ऊ खुदइ जोति नाइ रहा, मुला वहि जोति केर गवाही दियैक आवा रहइ। ⁹साँची जोति जउन हर एक मनई कइहाँ परकासित करत हये, जगत म आवे वाली रहइ।

¹⁰ऊ जगत म रहइ अउर जगत वहिके जरिये परगट भवा अउर जगत ऊका नाई पहिचानिसि। ¹¹वहु अपै घर आवा अउर वहिके अपनइ वहिका गरहन नाहीं किहिन। ¹²मुला जितने वहि का गरहन किहिन वइ वहिका परमेसुर केर सनतान होइकेर अधिकार दिहिन अरथात वहिका जउन वहिके नामु पर बिस्वासु राखति हई। ¹³ऊ न तइ लोहू ते, न सरीर कि इच्छा ते, न मनई कि इच्छा ते मुला परमेसुर ते पइदा भये हुई।

¹⁴अउर वचन देहधारी भवा, अउर अनुगरह अउर सच्चाई ते पूरा होय कै हमरे बीच मां डेरा किहिसि। अउर हमयूँ वहिकी अइसि महिमा देखेन जइसन बापु केर एकलौता बेटवा के होत हइ।

¹⁵यहुन्ना ऊके बारे म गवाही दिहिस अउर पुकारि केर कहिसि कि ई उहइ हइ जेकरे बारे म हम तोसे कहे रहे, कि ऊ जउन हमरे बारे मा आइ रहा हई, ऊ हमसे बढ़ि कै हइ, काहे ते ऊ हमते पहिले रहा।

¹⁶काहे ते उइकी परिपूरनता सइहन हम सबइ पाएन हई। यानी अनुगरह प अनुगरह। ¹⁷यहिते बेवस्था तउ मूसा केर जरिये दीन गवा हइ मुला अनुगरह अउर सच्चाई यीसु मसीह केर जरिये पहुँचि हइ। ¹⁸परमेसुर कइहन कउनउ कबहूँ नाई देखिसि, एकलौता पूत जउन बापु केर गोद मा हइ वही ऊ का परगट किहिस।

यहुन्ना बपतिसमादाता केर गवाही ई हय कि हम मसीह नाही हय

¹⁹यहुन्ना केर गवाही रहई हइ कि जब यहूदिन यरुसलेम सइहन याजकन अउर लेबियन क ऊते यहू पूछे कइहन भेजिन कि तु कउन हइ ? ²⁰तबइ ऊ यहू मान लिहिसि अउर इनकार नाही किहिसि मुला मानि लिहिस कि हम मसीह नाहीं हन।

²¹तबइ ऊ उहिते पूछिसि, फिर तू कउन हओ? का तू एल्लियाह हओ? ऊ कहिसि हम नाई हन, तउ का तू ऊ नबी हओ? ऊ जवाबु दिहिसि कि नाई।

²²तबइ ऊ उहिते पूछिसि, आखिर तू कउन हओ? जेहिते हम अपन भेजै वालेन का जबाबु देई। तू अपन बारे म का कहत हओ।

²³ऊ कहिसि—जइसन यसायाह नबी कहिसि हइ, हम जंगल मं एक पुकारै वाले केर आवाज हन कि तुम परभु केर मारग सीधा करउ।

²⁴ई फरीसियन केर ओरे ते भेजे गये रहई। ²⁵वै ऊते परसनु किहिन जौ तू मसीह नाही हौ। अउर न एल्लियाह अउर न ऊ नबी हइ तब बपतिसमा काहे देत हओ?

²⁶यहुन्ना तिनका का जबाबु दिहिसि, हम जौ पनिआ सइहन बपतिसमा देइत है, मुला तोहरे बीच म एकु मनई ठाढ़ हइ, वहिका तू नाई जानति हौ। ²⁷यानी हमरे बादइ आवइ वाला हइ, जेहिके जूतिन केर बन्धुन जउन खोलइके जोग हम नाई हन।

²⁸सै बातै यरदन नदिया केर पार वैतनियाह मइ

जहां यहून्ना बपतिसमा देत रहइ।

यीसु परमेसुर केर मेमनवां

²⁹दुसरे रोज यीसु केर अपन ओर आवत देखि केर कहिसि कि देखउ ई परमेसुर केर मेमना हइ जउन संसार केर पापन क उठाइ लेइ जात हइ। ³⁰ई उहै हइ, जेके बारे मां हम कहित रहइ कि एकु मनई हमरे पीछे आवति हइ जउन मोहिते सरेस्ट हइ, काहे ते ऊ हमरे ते पहिलेइ रहइ। ³¹अउर हम तउ ऊ का पहिचानित नाई रहै, पर यहिते हम जलते पानी ते बपतिसमा देत भये आवत कि उइ इसराएल पर परगट होइ जाई।

³²अउर यहून्ना ई गवाही दिहिस कि हम कबूतर केर समान आतमा कइहन आकास ते उतरत देखेन हइ, अउर ऊ वहिपै ठहरि गवा। ³³अउर हम तउ वहिका पहिचानित नाइ रहइ जउन हमका पानी ते बपतिसमा देइका भेजिसि, उइ मोहिते कहिसि कि जउन व तू आतमा का उतरत अउर ठहरत देखइ वहइ पवित्र आतमा ते बपतिसमा देइ वाला हइ। ³⁴अउर हम देखेन अउर गवाही दीन हइ कि इहे परमेसुर के बेटवा हइ।

यीसु केर पहिल चले

³⁵दुसरे दिन फिर यहून्ना अउर उइके चेलन मेते दुइ जने ठाढ़ रहै। ³⁶अउर ऊ यीसु पै जउन जाइ रहा रहै दोस्ती करि कइ कहिसि देखउ, ई परमेसुर केर मेमना हइ।

³⁷तब उइ दूनउ चले ऊ केर ई सुनिकइ यीसु के पाछे होइ लिहिन। ³⁸यीसु पाछे मुड़ि कइ अउर उहका पाछे आवत देखिन तब उइते कहिन कि तू केहिके खोज म हओ? उइ ऊते कहिन, हे गुरु आप केहर रहत हओ? ऊ उनत कहिसि, चल केर देखि लेऊ।

³⁹तब उइ आइके ऊके रहइ केर जगह देखिन अउर वहि दिन ऊके साथइ रहे। अउर दस बजे लगभग रहइ।

⁴⁰उइ दूनउ मते जउन यहून्ना कि बात सुनि कइ यीसु के पाछे होइ लिहै रहइ। एकु तौ समौन सुरु केर समौन पतरस केर भाई अनद्रियास रहइ। ⁴¹ऊ पहिले अपन भाई समौन ते मिलि कइ उहिते कहिसि कि हमका खीस्तय यानी मसीह मिल गवा हइ। ⁴²ऊ वहिका यीसु केर पास लइ आवा है यीसु वहि पर नजर डाल वहिका देखि कइ कहिसि तू यहून्ना केर बेटा समौन हइ जेके तुइ कैफा यानी पतरस कहिलइहइ।

फिलिप्पुस अउर नथैनिएल केर बुलावा

⁴³दुसरे दिन यीसु गलील सूबा आइकै जानइक चाहिसि अउर फिलिप्पुस ते मिलि कइ कहिसि हमार पाछे होइ लेई।

⁴⁴फिलिप्पुस तउ आन्द्रियास अउर पतरस केर नगर बैतसैदा क रहइ वाला रहइ। ⁴⁵फिलिप्पुस नतनएल ते मिलि कइ ऊ ते कहिसि ऊ हमका मिलि गवा ऊ यूसुफ केर बेटवा यीसु नासरी हइ।

⁴⁶नतनएल वहिते कहिसि का कउनउ नीक वस्तु नासरत ते निकरि सकत हइ? चलि कइ देखि लेव। फिलिप्पुस कहिसि।

⁴⁷यीसु नतनएल केर अपन ओर आवत देखि के ऊ के बारे म कहिसि देखउ ई सच्चई इसराएली हइ यहिमा कपट नाही हइ।

⁴⁸नतनएल वहिते कहिसि तू मोहिका कहां ते जानत हइ? यीसु वहिका जवाबु दिहिसि है वहिते पहिले कि फिलिप्पुस तोहिका बुलाइसि जब तू अंजीर के बिरवा केर नीचे रहेव, तबइ मै तुइका देखेन रहइ।

⁴⁹नतनएल ऊका जबाबु दिहिसि कि हे गुरु तू परमेसुर केर बेटवा हइ? तू इसराएली केर महाराजा हइ?

⁵⁰यीसु वहिका जबाबु दिहिसि जउन तोहिते कहिन कि हम तो हिका अंजीर के पेड़ तरे देखेन का तुइ यहिते विससवासु करत हौ? तू एहिते बड़े-बड़े कमवा देखिहउ। ⁵¹फिर वहिते कहिसि हम तोहिते सांच कहित हइ कि तुई सरग कइहन खुला देखिओ अउर परमेसुर के सरग दूतन का ऊपर जात अउर मनईन केर बेटवा क उतरत देखिहउ।

यीसु पानी कइहन दाखरस मा बदलत हइ

2 फिर तिसर दिन गलील केर काना मा इक बियाहु रहइ, अउर यीसु के महतारी उहां रहइ। ²यीसु अउर ऊके चेलनउ ऊ विवाह म नेवते गए रहइ। ³जबइ दाखरसु घटि गवा तबइ यीसु केर महतारी उहिते कहिन कि उनहुन के पासइ दाखरसु नाहीं रहा।

⁴तब यीसु ऊते कहिन हे मेहरारू मोहि तुमते का काम? अबहीं हमार समय नाहीं आवा।

⁵ऊकी माहतारी सेवकनु ते कहिसि कि जउनु कछु ऊ तुम्हते कही वही किहेउ।

⁶उहां यहूदिन केर सुध करै कि रीति के मुताबिक पाथर के छः मटका धरे रहइ जिनमा दुइ-दुइ, तीन-तीन मन समात रहइ।

⁷यीसु वहिते कहिन कि मटकन म पानी भरि देव

सो उनहिन उन्हका मुहै मुँह तलक भरि दीन।

⁸तब यीसु वहिते कहिन कि अब निकाकि कइ भोज के परधान केर पास लेई जाउ। ⁹उइ लय गये जब भोज के परधान ऊ पानी चखिन जउन दाख रसु बनि गवा रहइ, जेके परबन्ध करतौ नाहीं जानति रहइ कि ऊ कहाँ ते आवा पर जिन सेवकन लोगन पानी निकाकिन रहइ, जानत रहइ। एके निकालिन रहे तब भोज के परधान दुलहा के बुलाइस अउर ऊते कहिस। ¹⁰हर एकु मनई पहिले नीक दाखरसु हेत हइ अउर जवइ मनई पीकइ छकि जाति हइ तब बीच केर देत हइ। पर तुइ तउ नीक वाला दाखरसु अबई तलक राखि छोड़े रहेऊ।

¹¹यीसु गलील परदेसवा केर काना नगर मां अपन पहिल चीन्ह कामौ दिखाइकै आपन महिमा का परगट किहिन अउर उन कै चेलवन ऊ पर विसवास किहिन।

यीसु मंदिर मां

¹²यहि केर बाद ऊ अउर उइ केर महतारी अउर ऊ केर भइया अउर उ के चेलन कफरनहूम केर गए अउर उहाँ कुछु दिन रहे।

¹³यहूदिन केर फसह कै परब पास रहइ अउर यीसु यरुसलेम केर गए। ¹⁴अउर ऊ मंदिर मा बरधन अउर भेड़न अउर कबुतरन केर बेचइ वालेन अउर सरराफन केर बइठे दिखिन। ¹⁵अउर यीसु रस्सन केर कोड़ा बनाइके सब भेड़न अउर बरधन का मंदिर ते निकालि दिहिस अउर सरराफन केर पइसा का बिखेरि दिहिस अउर पीढ़न केर पलट दिहिस। ¹⁶अउर कबूतर बेचइ वालेन ते कहिस कि इन्हका इहाँ ते लइ जाउ हमारे बापु केर घर क व्यापार केर घर न बनाउ।

¹⁷तबइ ऊके चेलन केर याद आवा कि धरम सास्तर मां लिखा हये तोरे घर केर घुन मोहिका खाइ जाइ।

¹⁸ई पर यहूदिन औसे कहिन तुई जउनुई करत हओ ऊ (कमवा करे के तोहरे पास पास कउनो दावा है सिद्ध करिहो। हमका कऊनो चिन्ह दिखइहउ)

¹⁹यीसु उन्हका जबाबु दिहिस कि ई मंदिर क ढहाइ देउ अउर हम ऊका तीन दिन मा खड़ा करि देइब।

²⁰यहूदिन कहिन ई मंदिर केर बनावै मा छियालिस साल लगे हइ। अउर का तुइ वहिका तीनइ दिन म खड़ा करि दे हौ? ²¹पर उहिने वास्तव म अपन सरीर के मंदिर केर बारे म कहिस रहै। ²²तउन जब यीसु मुरदन मां ते फिर जीवित भवा हइ तब उनके चेलन

क याद आवा कि उइ ई कहिन रहइ अउर ऊ पवित्तर सास्तर अउर ऊ बचन का जउन यीसु कहन रहइ बिसवासु किहिन।

²³जबइ यीसु यरुसलेम मा फत्तह केर परब मा रहइ अउर तबइ बहुतन उइ चिन्हन क जउनु ऊ दिखावत रहइ देखि कइ ऊके नाम पइहन बिसवासु किहिन। ²⁴पर यीसु अपन आप क उन्हे के भरोसे पइहन नाई छोड़िन काहे ते कि उइ सबइका जानत रहा। ²⁵अउर ऊ का परयोजन नाई रहा कि मनई के बारे म कउनउ गवाही देइ, काहे ते ऊ आपइ जानत रहइ कि मनई के मन मा का हइ?

यीसु निकोदेमुस केर सिच्छा

3फरीसियन मा ते नीकुदेमुस नाम केर एक मनई रहइ जउन यहूदिन केर सरदारू रहइ। ऊ यहूदियन के सभाघर केर धर्मगुरु रहिस। ²ऊ राति क यीसु के पास आइके अउर यीसु ते कहिसि, हे रब्बी हम जानित हइ कि तू परमेसुर केर ओर ते गुरु होइके आवा हओ काहे ते कउनउ मनई ई अचरज भेर कामन क चीन्ह जउन तू दिखावत हइ अगर परमेसुर उइके साथे न होइ तउ नाइ दिखाइ सकत।

³यीसु उहिका जबाबु दिहिन, हम तुइते सच्चे—सच्चे कहित हइ कि अगर कउनउ मनई नवा रूप लइके न पैदा होई तउ परमेसुर केर राजे देखि नाई सकता हइ।

⁴नीकु देमस ऊते पुछिस, मनई जब बूढ़ होइ गवा तउ काहे ते जनम लेइ सकत हइ? का ऊ अपन अम्मा केर गरभ म दुसरिउ बार परवेज करि कइ जनम लेइ सकति हइ?

⁵यीसु जबाबु दिहिन कि हम तोहिते सच्चे—सच्चे कहित हइ, जब तलक कउनउन मनई पानी अउर आतमा ते न पैदा होइ तउ ऊ परमेसुर के राज म परवेस नाइ करि सकत। ⁶काहे ते जउन सरीर ते जनम लेत हइ ऊ आतमा हइ। ⁷अचरज न करउ कि हम तोहिते कहिस हइ, कि तोहिका नये सिरे ते जनम लेइके जरूरइ हइ। ⁸बयार जउन ओर चाहत हइ वोहरेइ बहति हइ अउर तू उहिका सबद सुनत हइ पर ई नाई जानत कि ऊ केहर सइहन आवत अउर कउने ओर जात हइ?

⁹नीक दैमुस ऊका जबाबु दिहिस कि ई बतिया कइसन होइ सकता हइ।

¹⁰ई सुनि कइ यीसु उइते कहिन कि तू इसराएलियन केर गुरु होइके ई बातन म नाई समझत। ¹¹हम तोहिते सही—सही कहित है कि हम जउनु जानित हइ ऊ कहित हइ अउर जेहिका हम देखेन हइ की गवाही

देइत हइ मुला तुइ हमारि गवाही स्वीकार नाइ करते हौ।¹² जबइ हम तोहिते जमिनियां केर बतियां कहित हइ, तबउ तू बिसवासु नाई करत हइ तब जौ हम तोहिते सरग की बातन का कहीं तब कइसन बिसवासु करिहउ? ¹³अउर कउनउ सरग म नाई चढ़ा, खाली वहइ जउन सरग ते उतरा यानी मनई केर बेटवा जउन सरग म हइ। ¹⁴अउर जउने ढँग ते मूसा जंगल म साँप कइहन ऊंचे प चढ़ाइसि रहा तउनइ ढँग ते जरूरइ मनई क पूतन ऊंचे प चढ़ावा जाइ। ¹⁵ताकि जउनउ कोई बिसवासु करइ उइ मां हमेसा ले जीवन पाइ।

¹⁶काहे ते परमेसुर संसार ते अइसइ परेम राखीस कि अपनु एकलउता बेटवा देइ दिहिस ताकि जउन कउनउ ऊ पै बिसवासु करइ ऊ नास न होय पर अनगिनत जीवन पावइ। ¹⁷परमेसुर अपन बेटवा केर संसार म यहिते नाइ भेजिस कि जगत पे दन्ड केर आग्या देइ पर ई लिहै भेजिस कि जगत ऊ के जरिये उद्धारू होइ। ¹⁸जउन वहिपे बिसवासु करत हइ ऊ पइ दन्ड केर आग्या नाई होई, पर जउन मनई वहिपे बिसवासु नाई करत ऊ दोसी ठहरा, काहे ते कि ऊ परमेसुर क इकलौते बेटवा के नाम पे बिसवासु नाई किहिस। ¹⁹अउर दन्ड केर आग्या केर कारन यहु हइ कि जोति संसार म आई हइ अउर मनईन अन्धेरे केर जोती ते अधिकइ पियारा जानिसि काहे ते उनकेर काम नीक नाई रहै। ²⁰काहे ते जउनु कउनउ बुराई करति हइ ऊ जोतिते बैरु राखति हइ। अउर जोति के नेरे नाइ आवति, अइस न होय कि ऊ केर कामन पर दोसु लगावा जाय। ²¹पर जउन मनई सचाई पे चलत हइ ऊ जोति केर नेरे आवति हइ, जेहिते ऊ के काम परगट होय कि व परमेसुर कि ओर ते किएइ गए।

यीसु केर बारे मां यहुन्ना बपतिसमा दाता केर गवाही

²²ई के बाद यीसु अउर उनकेर चेले यहूदिया देस म आए अउर हुवा उनहन के संगइ बपतिसमा देइ लागे। ²³अउर यहुन्ना यरुसलेम के नेरे एनोन म बपतिसमा देत रहइ। काहे ते उहां बहुतइ ढेर सारा पानी रहइ अउर मनई आके बपतिसमा लेत रहइ। ²⁴काहे ते यहुन्ना उइ समय तलक जेल खाने म नाई डारा गावा रहइ। ²⁵उहां यहुन्ना केर चलन क कउनउ यहूदी के साथ सुद्धि के बारे म वाद—विवाद भवा। ²⁶अउर वहू यहुन्ना के नेरे आइके ऊते कहिन हे रब्बी जउन मनई जरदने के वहि पार आपके साथ रहइ अउर जेहिकी तू गवाही दिहिस रहइ देखउ ऊ

बपतिसमा देत हइ, अउर सबइ मनई वहिके नेरे आवत हइ।

²⁷यहुन्ना जबाबु दिहिस जबइ तलक मनई क सरग ते नदीन जाय तब तलक ऊ कछु नाई पाइ सकति। ²⁸तुइ तौ खुदइ हमार गवाह हउ कि हम कहेन कि हम मसीह नाई हन पर ओसे पहिलेइ भेजे गएन हइ। ²⁹जेहिकी लुगाई वहइ हइ, उहै दुलहा हइ। पर दुलहे क साथी जउन ओके पासे ठाढ़ रहत अउर ऊ की बतिया सुनति हइ, दुलहे केर सबद ते बहुतइ खुस होत हइ। अब हमार ई खुसी पूर भाई हइ। ³⁰ई जरूरी हइ कि ऊ यीसु बढइ अउर हम घटी।

³¹यहुन्ना आगे कहत है, जउन ऊपर त आवत हइ ऊ सबते उत्तम हइ जउन जमीन ते आवत हइ, ऊ धरती केर हइ, अउर जमीन केर बतियां कहत हइ। जउन सरग ते आत हइ, ऊ सबन के ऊपर हइ। ³²जउन कछु ऊ देखिसि अउर सुनिस उही की गवाही ऊ देत हइ अउर कउनउ ऊ की गवाही स्वीकार नाइ करत। ³³जउनइ ओर गवाही स्वीकार कइ लीन्हिसि, ऊ ई बात पे छाप दइ दिहिस कि परमेसुर सच्चा हइ। ³⁴काहे ते जेहिका परमेसुर भेजिस हइ ऊ परमेसुर कि बातन केर कहत हइ, काहे ते परमेसुर आतमा क नाप—नाप के नाई देत हइ। ³⁵बापु बेटवा सइहन परेम राखत हइ। अउर ऊ सबइ चीजन केर उहिके हाथ म दइ दिहिसि हइ। ³⁶जउन बेटवा पइहन बिसवासु करत हइ अनगिनत जीवन उहिका हये। पर जउन बेटवा केर नाई मानत, ऊ जीवन केर न देखी, मुला परमेसुर केर गुस्सा ऊ पै रहत हइ।

सामरी मेहरारू ते यीसु

4 फरीसियन सुनिन हइ कि परभु कइहन मालूम भवा कि उ यहुन्ना ते ढेर मनई क चेला बनावत अउर उन्हका बपतिसमा देत हइ। ²अगरचे यीसु खुदइ नाहीं, बल्कि उनकेर चेले बपतिसमा देत रहइ। ³तबइ ऊ यहूदियन क छोड़ि कई गलील क चला गवा है।

⁴अउर ऊका सामरिया ते होईके जाब जरूरी रहइ। ⁵यहिते ऊ सूरवार नाम सामरिया केर एक नगर तलक आवा, ई नगर जउन उई जमीन केर पासइ रहा जेहिका याकूब अपन बेटवा यूसुफ केर दिहिसि रहइ। ⁶अउर याकूब केर कुँअव हुवै रहइ यहिते यीसु मारग क थका भवा ऊ कुँआ पे ऐसइ बइठ गवा अउर इ बात छठे घंटे के लगभग घटी।

⁷इत्ते म एकु सामरी अउरतिया कुँआ पै पनिया भरइ केर आई। यीसु ऊ ते कहिन मोहिका पनिया

पिलाउ।⁸ काहे ते वहिके चले नगर म भोजनु मोलु लइके गये रहै।

⁹ऊ सामरी अउरत वहिते कहिसि तू यहूदी हइ कइ सामरी अउरतिया ते पनिआ काहे मांगति हइ? काहे ते यहूदी सामरियन के साथइ कउनउ परकार केर बेवहार नाई राखत।

¹⁰यीसु जबाबु दिहिन कि जौ परमेसुर केर बरदानु जानति अउर इहउ जानति कि ऊ कोनु हइ जउन तोसे कहिसि हइ मोहिका पनिआ पिलाउ तबु तुइ वहिते मांगति अउर ऊ तोहिका जीवन केर पनिआ देति।

¹¹अउरतिया वहिते कहिसि हे परभु तोहरे पासइ पानी भरइक तउ कुछ हइअउ नाहीं अउर कुइयाँ गहिरे हइ, तउ फिर ऊ जीवन केर पनिआ तोहरे पासइ केहर ते आवा।¹² का तू हमार बापु याकूब सेइ हो बड़ा हओ, जउन हमका ई कुइयाँ दिहिसि अउर खुदइ अपन बाल—बच्चन अउर ढोरन समेत वहिमा ते दिहिन।

¹³यीसु वहिका जबाबु दिहिन कि जउन कउनउ ई पनिआ क पीहई फिरउ पियासा होई।¹⁴ पर जउन कउनउ जलु मां ते पीहइ जउन हम वहिका देइब ऊ ओमे फिर दुबारा अनन्त कालु तलक पियासा न होई हइ बल्कि जउन अनन्त जीवन के खातिर उमड़त रहिहइ।

¹⁵अउरतिया ऊते कहिसि हे परभु! ऊ जलु मोहिका देय जेहिते हम कबौ पियासी न होई, अउर न जलु भरइक इत्ती दूर आई।

¹⁶यीसु ऊ ते कहिन जाउ अपन मरद इहई बुलाइ लाउ।

¹⁷अउरतिया कहिसि कि हम बिनइ मरद के हन।¹⁸ यीसु ऊते कहिन कि तू ठीकइ कहति है कि हम बिनइ मरद के हन, काहे ते तुइ पांच मरद करि चुकी हइ। अउर जेहिके साथे तुइ अब हइ, वहवु तोहार मरद नाई, ई तोहि सचु कहेव हइ।

¹⁹अउरतिया यीसु ते कहिसि, हे परभु मोहिका जान पड़त हइ कि तुइ कउनउ नबी हइ।²⁰ हमरे बापदादन इहे पहड़िया पे भजनु किहिन, अउर तुइ कहति हइ कि ऊ जगह उ हेहर भजनु करइ चाही ऊ यरुसलेम मा हइ।

²¹यीसु ओसे कहिन हे अउरतिया हमरी बतियन पर बिसवासु करउ कि ऊ समयउ आइ गवा कि जबइ तुइ न तो ई पहार प बाप केर भजनु करिहउ अउर न यरुसलेम म।²² तू जेहिका नाइ जानित वहिका भजनु करति हउ, अउर हम जेहिका जानति हइ ऊ का भजनु करति हइ, काहे ते उद्धारू

यहूदियन म ते होई।²³ पर ऊ समय आवत हइ बल्कि अबहू हइ जेहिमा साँचे भगत बापु केर भजनु आतमा अउर सचाई ते करि हइ। काहे ते बापु अपनु खातिर अइसन भजनु करइ वालेन क दूढ़ति हइ।²⁴ परमेसुर आतमा हइ, अउर जरुरइ हइ कि वहिके भजनु करइ वलो आतमा अउर सचाई ते ओकी भजनु करइ।

²⁵अउरतिया वहिते कहिसि हम ई जानित हइ कि मसीह जउन खीस्तुस कहावति हइ, आवइ वाला हइ। जबइ ऊ आई तब हमका सबही बतिया बताइ देइ।²⁶ यीसु उइते कहिन कि हम जउन तोहिते कहिन हइ वहइ हइ।

यीसु केर चेलवन आवत हये

²⁷इतनेइ म ऊके चेलउ आइ गये अउर अचरज करइ लागे कि ऊ (यीसु) एकइ अउरतिया ते बातइ करत रहति हइ तउ प कउनउ चेलवे नाही पूछत हइ कि तुइका का चाहत हइ या काहे उइते बातइ करति हइ।

²⁸ तबइ अउरतिया अपन गगरिया छोड़ि कइ नगर म चली गई, अउर लोगन ते कहइ लागी।²⁹ आउ, एकु मनई केर देखउ जाउन सबइ कुछ जउन हम किहेन मोहिका बताइ दिहिसि, कहूँ इहइ तउ मसीह नाइ हइ? ³⁰ सो वै मनई नगरु ते निकरि कइ ऊ के पासइ आवे लाग।

³¹ इत्ते म ऊ के चेलइ यीसु ते विनती करइ लाग। कि हे रब्बी कछु खाइ लेउ।

³² पर ऊ वहिते कहिन, हमरे पासइ खाइक अइसइ भोजनु हइ जेहिका तुइ नाई जानति हइ।

³³ तबइ चेलइ आपस म कहिन का, कउनउ ऊ के खातिर कछु खाइक लावा हइ?

³⁴ यीसु उनहुन ते कहिन हे हमार भोजनु ई हइ कि हम अपन इक भेजई वाले कि मरजी के अनुसार इ चली अउर ऊ का कामु पूरा करी।³⁵ का तुम नाई कहति कि फसल केर कटनी होइ म अबहूँ चारि महिनवा बाकी हइ, देखउ, तोसे कहित हइ कि अपन अखियन क उटाइ कर खेतन पर दिरिस्टी डालउ कि कटनी के खातिर पकि चुके हइ।³⁶ अउर काटइ वाले मजदूरी पाई अउर हमेसा कि जिन्दगिउ के खातिर फलउ बटोरति हइ। जेहिते बोवइ वाल अउर खुसी मनावइ।³⁷ काहे ते ई पइ ई कहावत ठीकइ बइठति हइ कि बोवइ वाल अउर हइ, अउर काटइ वाल अउर ³⁸ हम तोहिका ऊ खेतवा केर काटइ के खातिर भेजने जेहिमा तुइ मेहनति नाई किहिस दुसरेन परिसरम

किहिन अउर तू उनहुक परिसरम केर फलउ मा भागी भयेउ।

बहुतै सामरियन केर यीसु पै बिसवासु

³⁹अउर ऊ अउरतिया के कहे ते जउन ई गवाही दीन रहइ कि ऊ सबइ कछु जउन हम कीन रहइ मोहिका बताइ दिहिस उइ नगरु के बहुतइ सामरियन मनई बिसवासु किहिन। ⁴⁰तबउ जब ई सामरी ऊ यीसु के पासइ आये तब यीसु ते विनती करइ लाग कि हे हमरे इहां ठहरउ यहिते ऊ उहां दुइ दिन तलक ठहरा रहा। ⁴¹अउर वहिके वचन के कारन अउरउ बहुतेरेन बिसवासु किहिन।

⁴²अउर उइ अउरतिया ते कहिन अब हम तोरे कहेइ ते बिसवासु नाई करित काहेते खुदइ सुन लिहेन अउर जानित हइ कि इहइ सचमुच म संसारु केर उद्धारु करता हइ।

यीसु एक ओहदेदार केर बेटवा क चंगा करत हय

⁴³तबइ उन दुइ दिनन के बादि ऊ उहां ते चलि कइ गलील परदेस क चला गवा है। ⁴⁴काहे ते यीसु खुदई गवाही दिहिन कि नबी अपन देस म आदरु नाई पावत है। ⁴⁵जबइ ऊ गलील परदेस म आवा है तउ गलीली खुसी-खुसी उहिते मिले, काहे ते जितनेइ काम ऊ यरुसलेम म परब केर समय किहिन रहइ उइ उन सबका देखिन काहे ते उहू परब पै गइ रहइ।

⁴⁶तब ऊ फिर गलील केर काना म आवा जहां ऊ पानी ते दाखरस बनाइसि रहइ अउर राजा केर एकु करमचारी रहइ—जेहिका बेटवा कफरनहुम म बीमारु रहइ। ⁴⁷ऊ ई सुनि कइ कि यीसु यहूदिया केर गलील म आइ गवा हइ। ऊ के पासे गवा अउर वहिते विनती करइ लाग कि साथइ चलिके हमार बेटवा केर चंगा करि देउ, काहे ते ऊ मरइ प हइ।

⁴⁸यीसु ओते कहिसि कि जबइ तलक तू चीन्ह अउर अचरज केर कामन क न देखिहउ तबइ तलक कबहू बिसवासु न करिहउ।

⁴⁹राजा केर कमरचारी ऊते कहिसि, हे परभु हमार बेटवा के मरइ ते पहिले चलउ।

⁵⁰यीसु वहिते कहिन जाउ तोहार बेटवा जीवित हइ। ऊ मनई यीसु कि बातय केर बिसवासु किहिस अउर चला गवा। ⁵¹ऊ मारग म जाइ रहा रहइ कि वहिके सेवकु वहिते आइ मिले अउर कहइ लाग कि वहिका बेटवा जियत हइ। ⁵²ऊ वहिते पूछिसि कि कउन घरी ऊ अच्छा होय लगा? उइ ऊते कहिन कि

कल सातएँ घन्टे म वहिकर ज्वर उतरि गवा।

⁵³तब बापु जानि गवा कि ई उहइ घड़ी भवा जेहि घड़ी यीसु उहिते कहिन रहइ कि तोहार बेटवा जियत हइ, अउर ऊ वहिके घराने के सबइ लोगन बिसवासु किहिन।

⁵⁴ई दूसर अचरज केर कामु रहइ जउन यीसु यहूदियन ते गलील ते आइके दिखाइन।

जल कुन्ड पइ चंगाई

5ऐसी बातन के बाद यहूदियन केर एकु परब भवा अउर यीसु यरुसलेम क गये। ²यरुसलेम म भेड़ फाटक केर पास एकु कुन्ड रहय जउनु इब्रानी भासा म बेतसइदा कइलावत रहय। अउर उहिके पांच ओसारे रहइ। ³इन्हां बहुतेरे रोगी अन्धे, लंगड़े अउर सूखे अंगन वाले पनिया केर हिलइ कि आस म पड़ेइ रहति रहइ। ⁴काहे ते ठीक नियत समय पे परमेसुर केर सरग दूत कुन्ड म उतरि कइ पनिया केर हिलावा करति रहइ। पनिया के हिलतइ जउन कउनउ सबके पहिलेइ पनिया म उतरति ऊ चंगा होइ जाति रहइ। चाहे ऊ की कउनउन बीमारी काहे न होय। ⁵उहइ एकु मनई रहइ जउन अइतीस बरस ते बीमारी म पड़ा रहइ। ⁶यीसु वहिका पड़ा भवा देखि कइ अउर जानि कइ कि ऊ बहुतइ दिनन ते अइसन दसा म पड़ा हइ। ओसे पूछिन का तुइ चंगा होइक चाहत हइ हौं।

⁷ऊ बीमारु वहिका जबाबु दिहिस कि हे परभु हमरे पास कउनउ मनई नाई कि जब पनिया हिलावा जाइ तउ हमका ई कुन्ड मां उतारेइ, पर हमरे पहुंचत—पहुंचत दूसर हमते पहिलेइ पानी मां उतरि पड़ति हइ।

⁸यीसु उहिते कहिन कि उठ अपन खटिया केर उठाइ के चलउ फिर। ⁹ऊ मनई तुरतइ चंगा होइ गवा अउर अपन खटिया केर उठाइ कइ चलइ फिरइ लाग। ¹⁰ऊ सबत के दिन रहइ, यहिते यहूदी वहिते जउन चंगा भवा रहइ कहइ लाग कि आजु तउ सब तक दिनु हइ तुहिका खटिया उठावबु उचित नाई हइ।

¹¹वहु ऊ का जबाबु दिहिस कि जउन मोहिका चंगा किहिस वहइ हम ते कहिसि अपन खटिया उठाइके चलउ फिरउ।

¹²उइ उहिते पूछिन कि ऊ कउनु मनई हइ जउन तोहिते कहिसि कि खटिया उठाइ के चलउ फिरउ।

¹³पर जउन चंगा हुइ गवा हरइ ऊ नाई जानति रहइ कि ऊ कउन हइ। काहे ते उइ जगह म भीड़ होइके कारन यीसु उहां ते हटि गवा रहइ।

¹⁴ई बातन के बादि ऊ यीसु केर मंदिर म मिला

तब वहि ने ऊते कहा देखउ तुइ तउ चंगा हुइ गवा। फिर ते पापु न किहेउ, ऐसन न होय कि यहिते कउनउ भारी संकटु तोहि पे आई परइ।¹⁵ऊ मनई जाइ के यहूदियन ते कह दिहिस कि जउन मोहिका चंगा किहिस ऊ यीसु हइ।

बेटवा दुआरा जीवन

¹⁶यहि कारन यहूदी यीसु क सतावइ लाग, काहे ते कि ऊ अइस काम सबत के दिनन पे करत रहेँ ¹⁷इह पर यीसु उइते कहिन फिर हमार बापु अब तलक कामु करत हइ अउर हमहूँ कामु करित हइ। ¹⁸यहि कारन यहूदी अउरउ अधिक उके मारि डारइक परयतन करइ लाग, कि ऊ न खाली सबत के दिननु म विधि कानून क तोड़िसि हइ, पर परमेसुर क आपन बापु कहिके आपने आप का परमेसुर क आपन बापु कहिके आपने आप का परमेसुर के बराबर ठहरावति हइ।

¹⁹इ पर यीसु उहिते कहिस कि हम तोहिते सच—सच कहित हइ बेटवा अपन ते कछु नाइ करि सकत हइ, खाली बहु जउन बाप क करत देखत हइ काहे ते जउन कामन क ऊ करति हइ उनहिन केर बेटवउ उहइ रीति ते करति हइ। ²⁰काहे ते बेटवा परेम राखति हइ अउर जउन—जउन कामन क ऊ खुदइ करति हइ ऊ सबई वहिका दिखावति हइ अउर इततेउ बडे कामुन वहिका दिखाई जेहिते ते तुइ अचरज करइ। ²¹काहे ते जइसन बाप मेरे हुअन केर उठावति अउर जिलावति हइ वइसइ बेटवउ जे का चाहति हइ ऊ का जिलावति हइ। ²²अउर बाप बेटवा केहुक नियावउ नाई करति, पर नियावु करइ केर सबइ काम बेटवा केर सौंपि दिहिन हइ। ²³यहिते कि सबइ मनई जइसन बापु केर समानु आदरु करत हइ बइसनेइ बेटवउ केर आदरु करइ। जउन बेटवा क आदरु नाई करति।

²⁴हम तोहिते सच—सच कहित हइ जउन मनई हमार बचन केर सुनिकइ हमरे भेजइ वालेन क बिसवासु करति हइ हमेसा केर अनन्त जीवनु ओहि केर हइ। अउर वहिपे दन्द कि आग्या नाई लेवत पर ऊ मिरतु ते पार होइकइ जीवनु म परवेस करि चुका हइ। ²⁵हम तुहिते साचि कहित हइ कि ऊ समय आवति हइ अउर अबइ हइ जेहिमा मरइ वाले परमेसुर के बेटवा क सबद सुनिहई, जउन सुनिहई वइ जी हइ। ²⁶काहे ते जइसन बाप अपन आप म जीवनु राखत हइ वइसेइ रीति ते बेटवा केर अधिकारु दिहिन हइ कि अपन आप म जीवन राखइ। ²⁷वल्कि वहिका नियाउ करइक अधिकारउ दिहिस हइ,

यहिते ऊ मनई क बेटवा हइ।

²⁸इहिते सुनि केर अचरज न करेव, काहे ते ऊ समयउ आवत हइ कि जितनेइ कबरन म हई ऊ का सबद सुनि कइ निकरि हई। ²⁹जउन भलाई कीन्ह हइ उइ जीवनु केरे पुनुरुस्थान के खातिर जी उठि हइ अउर जउन बुराई किहिन हइ इउ दन्द केर पुनुरुस्थान के खातिर जी उठि हई। ³⁰हम अपने आप ते कछु नाई करि सकति। जइसइ सुनति हइ वइसइ नियायु करति हइ अउर नियाउ सच्चइ हइ, काहे ते हम अपन मरजी नाई पर अपन के भेजई वाले केर मरजी चाहित हइ।

यीसु केर बारे मां साछी

³¹अगर हम अपइ गवाही देई तउ हमार गवाही सच्चे न होई। ³²एकु अउरउ हइ जउन हमार गवाही देति हइ अउर हम जाति हइ कि हमरि जउन गवाही देति हइ, ऊ सांची हइ।

³³तुइ यहून्ना ते पुछवाइसि अउर ऊ सांची गवाही दिहिस हइ। ³⁴पर हम अपन बारे म मनई केर गवाही नाइ चाहित तउ हम ई बतियन क यहिते कहित हइ कि तोहिका मुक्ती मिलइ। ³⁵ऊ तउ बरत अउर चमकत भवा दीपकु हइ अउर तोहिका कछु देर तलक ऊकी जोति मा मगन होब अच्छइ लाग।

³⁶पर हमरे पासइ जउन गवाही हइ, ऊ यहून्ना केरे गवाही ते बड़ी हइ काहे ते जउन कामु बापु हमका पूर करे का सौंपिन हइ। यानी इहइ कामु जउन हम करित हइ उइ हमार गवाही हइ कि बापु हमका भेजिन हई। ³⁷अउर बापु जउन हमका भेजिस हइ उहइ गवाही दिहिस हइ, तुम लोगन कबहूँ वहिका सबद न सुनेउ हई अउर न वहिका रूप देखेउ हइ। ³⁸अउर वहिके बचनन क मनमा थिर नाई राखति हउ, काहे ते ऊ जेहिमा भेजिस उइकी परतीति नाई करति हउ। ³⁹तुम पवित्तर सास्तरन म खोजति हओ, काहे ते समझति हओ कि वहिमा तोहिका हमेसा केर जीवनु हइ। अउर ई वहइ हइ, जउन हमार गवाही देति हइ। ⁴⁰तबहूँ तुम जीवन पावइ के खातिर हमरे पास आवा नाई चाहति।

⁴¹हम मनईन ते सम्मानु नाई चाहित। ⁴²पर हम तोहिका जानित हइ कि तोहिमा परमेसुर केर परेम नाई हइ। ⁴³हम अपन बापु के नाम ते आपन हइ अउर तुम हमका स्वीकार नाई करति हउ जौ कउनउ अउर अपनेइ नाम ते आवइ तउ वहिका स्वीकार करि लेहउ। ⁴⁴तुम जउन एक दूसरे ते आदर चाहति हउ अउर वहु आदरु जउन अद्वैत परमेसुर के ओर ते हइ

नाई चाहति। केहि ढंग ते बिसवासु करि सकत हउ।
⁴⁵ई न समझाउ कि हम बापु के समुहे तुम पइ दोसु लगइव। पइ दोसु लगावइ वाला तउ हइ, यानी मूसा जेहि पे तुम भरोसा राखे हउ।⁴⁶काहे ते यदि तुम मूसा पइहन बिसवासु करत हओ। हमरो परतीत करते ओ काहे ते कि उते हमरे बारे म लिखिस हइ।
⁴⁷पर जो तुम वहिकी लिखी भई बातन पै बिसवासु नाई करते हौ। तउ हमार बातन पै काहे बिसवासु करि हउ।

यीसु पांच हजार केर भोजन खवावत

6ई बतियन के कुछ समय बढइ यीसु गलील सूबा केर झील के पासइ गये।²अउर याक बड़ी भीड़ ओकरे पाछे—पाछे हुवै लीन काहे ते जउन अचरज केर कामु ऊ बीमारन प दिखावति रहइ वइ उनका देखति रहइ।³तबइ यीसु याक पहड़िया प चढ़ि कइ अपन चेलन केर साथइ उहई बइठे।⁴अउर यहूदियन क फसह केर परबु नेयरे रहइ।

⁵तबइ यीसु अपन अँखिया उठाइके याक बड़की भीड़ का अपन पासइ आवति देखिनि, अउर फिलिप्पुस ते कहिन कि हम इनहन केर खातिर कहां ते रोटिन केर मोलु लाई ?⁶पर ऊ यहि बात केर परखइ केर खातिर कहिन, काहे ते ऊ आपइ जानति रहइ कि हम का करिबे।

⁷फिलिप्पुस वहिका जबाबु दिहिस कि दुई सौ दीनार केर रोटीओ उन्हेके खातिर पूर न होइ हइ। उन्हेमा ते हर याक केर थोर—थोर मिलि जाय।

⁸ऊ के चेलन मां ते समौन पतरस के भइया अन्द्रियास वहिते कहिस।⁹इहां पर एकु लरिका हइ जेहिके पासइ पांच रोटी अउर दुइ मछरिउ हइ। पइ इतने मनईन के खातिर वइ का होइ।

¹⁰यीसु कहिन, कि मनईन क जमीन पै बइठाइ देउ। उइ ठउरे बहुतइ घास रहइ तबइ उइ लोग जउन गिनतिय लगभग पांच हजार रहइ बइठ गे।¹¹तबइ यीसु रोटिन केर लिहिन अउर परमेसुर केर धन्यवादु करि कइ बइठइ वालेन मं बांटे दिहिन। उहइ परकार मछलियन मां ते जितनइ उइ चाहति रहइ बांटे दिहनि।

¹²जबइ उइ खाई केर तिरपत होइ गे तबइ ऊ अपनु चेलन ते कहिनि कि बचे भये टुकरन केर बटोरि लेउ कि कहुँ फेंका न जाइ।¹³यहिते उनहन बेटोरि लिहिन अउर जबकि पांच रोटिन के टुकरे जउन खाइ वालेन ते बचि गे रहइ उन्हे की बारह टोकरियां भरि गई।

¹⁴तब जउन अचरज केर कामु ऊ करि दिखाइसि

वहिकी उइ लोगन देखि कइ कहइ लाग कि ऊ नबी जउन जगत म आवइ वाल रहइ जरूर यहे हइ।

¹⁵यीसु इ जनि के कि वइ मोहिका राजा बनावइ के खातिर आइके पकड़व चाहत हई, तब पहारु पर अकेलेइ चला गवा।

यीसु पानी पे चलव है

¹⁶तबइ जबइ सांझ भइ तउ यीसु उइके सबइ चेले झील केर कि नारइ गये।¹⁷अउर उइ नाउ प चढ़ि कइ झील केर पार कफरनहूम क जाइ लागे। ठइ समय अंधेरु हुइ गवा रहा अउर यीसु अबहिन तलक उन केर पासइ नाई आवा रहइ।¹⁸अउर आंधी केर कारन झील केर लहरिया उठइ लागि।¹⁹यहिते जब उइ नइया खेवत—खेवत तीनि—चारि केर करीबइ गये तबइ उइ यीसु केर झील पे चलति—अउर नइया केर पासइ आवति देखिन अउर डरि गये।²⁰पर यीसु वहिते कनि हम ते डरउ मत।²¹यहिते वहि वहिका नइया प चढ़ाइ लेवइ के खातिर तय्यार भये अउर तुरंतइ ऊ नइया उइ जगह।

²²दूसरे दिन उइ भीड़ जउन झील केर पासे ठाढ़ि रहइ, ई देखि कइ कि इहां याकु केर छोरि कइ अउर कउनउ छोटि नाउ न रही अउर यीसु अपने चेलन चले गये रहइ।²³यहिते जबइ अउर छोटि नइया तिविरियास ते उइ ठउर के पासइ आई जहई वइ परभु केर धनवादु करि रोटी खाइन रहइ।²⁴यहिते जबइ भीड़ देखिसि कि इहां यीसु हइ अउर न उनकेर चेलइ तउ वहइ छोटि—छोटि नइयन प चढ़िकइ यीसु केर दूढ़ति—दूढ़ति कफरनहूम क पहुँचि गये।

यीसु जीवन केर रोटी

²⁵अउर झीलइ केर पार ऊते मिलि कइ कहिन कि हे रब्बी तुइ इहां कबइ आइ गयेउ।

²⁶यीसु उनका जबाबु दिहिन कि हम तुहिते सांची—सांची कहित हउं तुम्ह हमका यहिते नाई दूढ़ति हउ कि तुइ अचरज केर कमवा देखई पर यहिते कि तुम्ह रोटिन केर खाइके तिरिप्त भये हउ।²⁷नास होय वाले भोजन के खातिर मेहनत न करउ, पर उइ भोजन के खातिर मेहनत करउ जउन अनन्त जीवन—तलक ठहरति हइ जउन मनई केर बेटवा तुहिका देई, काहे ते बापु यानी परमेसुर वहि पर छापु लगाय दिहिस हइ।

²⁸उनहन यीसु ते कहिन परमेसुर केर कामन केर करइ केर खातिर हम का करी?

²⁹यीसु उन्हेका जबाबु दिहिसि परमेसुर केर काम

ई हइ कि उइ पइ जउन वहिका भेजिस हइ, बिसावासु करउ।

³⁰तबइ उनहूँ ऊ ते कहिन तउ तुइ कउन चिन्हवा दिखावति हइ कि हम उहिका देखि कइ तू पइ परतीति बिसवासु करी? कउन स काम दिखावति हइ? ³¹हमार बाप दादन जंगल म मन्ना खाइनि जइस लिख धरम सास्तर म लिखउ हइ कि ऊ उन्हेके खाइके खातिर सरग ते रोटी दिहिस।

³²यीसु उन्हेते कहिन कि हम तोहिते सांचि—सांचि कहति हइ कि मूसा तोहिका ऊ रोटी सरग ते नाई दिहिस पर हमार बापु तुहिका सच्चिई रोटी सरग ते देत हइ। ³³काहे ते परमेसुर केर रोटी वहइ हइ जउन सरग ते उतरि कइ जगत केर जीवनु देति हइ।

³⁴तबइ उइ ऊ ते कहिन है परभु ई रोटी केर हमका हमेसा दिया करउ।

³⁵यीसु उन्हेते कहिन जीवन केर रोटिया हम हन जउन हमरे पासइ आई ऊ कबहूँ भूखा नाई होई अउर जउन हमरे प बिसवासु करी ऊ कबहूँ पियासा न होई। ³⁶पर हम तोसे कहति हइ कि तूने मोहिका देखउ लिहिस हइ तउ, बिसवासु नाई करति। ³⁷जउन कुछ बापु हमका देत हइ ऊ सबइ हमरे पास अइ हइ, अउर जउन कउनउ हमरे पास अइहइ वहिका हम कबहूँ न निकलबे ³⁸काहे ते हम अपन इच्छा नाहीं बल्किर अपन भेजइ वाले कि इच्छा पूरी करइ के खातिर सरग ते नीचे उतरेन हइ। ³⁹अउर हमका भेजइ वाले कि इच्छा ई हइ कि जउन कछु ऊ मोहिका दिहिस हइ वहिमा ते हम कछु न खोई, पर ऊ का हमके आखिरी दिन पइ फिरि ते जियाइ देइ। ⁴⁰काहे ते हमार बापु केर ई इच्छा हइ कि जउन कउनउ बेटवा केर देखई अउर आपइ बिसवासु करइ ऊ के जीवनु पावइ हम वहिका आखिरी दिन पे फिरि ते जियाइ देइब।

⁴¹यहि ते यहूदी यीसु पर कुड़कुड़ाइ लगे, काहे ते कि ऊ कहिस रहइ कि जउन रोटी सरग ते उतरी ऊ हम हन। ⁴²अउर वइ कहिन का इव यूसुफ केर बेटवा यीसु नाई जेके भाई—बाप केर हम जानित हइ? तउ ऊ कइसन कहति हइ कि हम सरग ते उतरे हन।

⁴³यीसु उन्हेका जबाबु दिहिस आपस म मत कुड़कुड़ाउं ⁴⁴कउनउ हमरे पास नाई आइ सकति, जबइ तलक बापु, जउन हमका भेजिस हइ उइका खींचि न लेई अउर हम वहिका आखिरी दिन पर फिरि ते जियाइ देइब। ⁴⁵नबिन केर लेखन म ई लिखल हइ कि उइ सबइ परमेसुर का ओर ते सिखाए भये होइ हइ। जउन कउनउ बाप ते सुनिसि

अउर लिखिस हइ, ऊ हमरे पासइ आवत हइ। ⁴⁶ई नाई कि कउनउ बापु केर देखिसि। पर जउन परमेसुर कि ओर ते हइ खाली वहइ बापु केर देखिसि। ⁴⁷हम तुहिते सांचइ—सांचइ कहति हइ, जउन कउनउ बिसवासु करि हइ हमेसा जीवनु वहिकइ होइ। ⁴⁸जीवनु केर रोटी हमही हन। ⁴⁹तोहरे पुरखे बाप—दादे जंगलु म मन्ना खाइनि अउर मरि गे। ⁵⁰ई उइ रोटी हइ जउन सरग ते उतरती हइ जेहिते मनई वहिमा ते खावइ अउर न मरइ। ⁵¹जीवन केर रोटी जउन सरग ते उतरी वइ हमही हन। अगर कउनउ मनई ई रोटी माते खाए तउ ऊ हमेसा तलक जीअत रहिहइ, अउर जउन रोटी हम जगत के जीवन के खातिर देइब ऊ हमार देह हइ।

⁵²ई सुन यहूदी ई कहि कइ अपसइ म झगड़ई लाग कि ई मनई काहे ते हमका अपना मांसु खाई के देइ सकत हई।

⁵³यीसु उन्हेते कहिन हम तुहिते सांचइ—सांचइ कहति हइ कि जबइ तलक मनई केर बेटवा केर मांस न खइहो, अउर वहिका लोहू न पियउ तुम ते जीवनु नाई। ⁵⁴जउन हमार मांसु खात अउर हमार लोहू पित हइ हमेसा केर जीवनु वहिक हइ, अउर हम आखिरी दिन पे फिरि ते ओके जियाइ देइब। ⁵⁵कहाते हमार मांस सांचि मां खाइ केर सामान हइ, ऊ अउर हमार लोहू दरअसल पियइ केर चीज हइ, ⁵⁶जउन हमार मांस खात अउर हमार लोहू पियत हइ, ऊ हम मां हमेसा रहत हइ अउर हम वहिमा। ⁵⁷जइसन जिअत बापु हमका भेजिसि अउर हम बाप केर कारन जिअति हइ, वइसइ वहउ जउन हमका खइहइ हमरे कारन जिअत रहिहइ। ⁵⁸जउन रोटी सरग ते उतरी रहइ हइ। बाप—दादन की तरह नाई खाइनि अउर मरिगे जउन कउनउ ई रोटी खइहइ ऊ हमेसा जिअत रहिहई ⁵⁹ई बात केर बहु कफरनहूम केर याक आराधनालय म परवचन देत समय कहिन।

बहुते चेलन यीसु कइहन छोड़ देत हई

⁶⁰इहे लिन वहिके चेलन मते बहुतन ई सुनि कइ कहिन ई बात नागवार हइ। ई का कउनउ नाई सुनि सकति हई।

⁶¹यीसु अपन मन मा ई जानि कइ कि हमरे चले इ आपस मइ ई बात पे कुड़कुड़ाति हइ। उन्हेते पूछिन की का ई बात ते तोहिका ठोकरू लागति हइ? ⁶²अउर अगर तुइ मनई केर बेटवा केर जगइ ऊ पहलेइ रहइ उहां उपरि केर जाति देखि हउ तउ तोहार का होई। ⁶³आतमा तउ जीवन देइ वाली इह अउर

सरीर ते कुछ लाभु नाई, जउनइ बातन केर हम तोसे कहित हइ, उइ आतमा हइ, अउर जीवनउ हइ।⁶⁴पर तुहिमा ते केत्ते अइसन हइ जउन बिसवासु नाई करति काहे ते यीसु पहिलेइ ते जानति रहइ कि जउन बिसवासु नाई करति उइ कउन हइ अउर कउन हमका पकड़वइहइ।⁶⁵अउर वहि कहिसि यहिते हम तुहिते कहेइ रहा कि जबइ तलक बापु की ओर ते ई बरदानु ना दी जाइ तबइ तलक हमरे पासइ नाइ आइ सकति।⁶⁶ई पर वहिके चेलन म ते बहुतेरइ उलटे फिर गए अउर ऊ के बादि म वहिके साथई न चले।

⁶⁷तबइ यीसु उइ बारहुन ते कहिन का तुइउ चले जाइक चाहत हऊ?

⁶⁸समौन पतरस वहिका जबाबु दिहिस हे परभु हम केहिके पासइ जाइ? अनन्त जीवनु केर बाइ तउ आप केर पासइ हइ।⁶⁹अउर हम बिसवासु किहेन अउर जानि गएन कि परमेसुर केर पवित्तर मनई तुहइ हउ।

⁷⁰यीसु उन्हेका जबाबु दिहिन का हम तुम बारहुन केर नाई चुनेन? फिरउ तुमरे मते याकु मनई सइतानु हइ।⁷¹ई उ समौन इस्करियोती केर बेटवा यहूदा कर बारे म कहिसि काहे ते इहइ उन बारह म ते रहइ जउन वहिका पकड़वाइस रहइ।

यीसु यहूदियन केर परब मा जात हय

7ई बातन के बादि यीसु गलील म घूमत रहा काहे ते यहूदी उइका मारि डाइ केर यतन करि रहे रहइ। यहिते यहूदियन म फिरब नाइ चाहति रई।²अउर यहूदियन के मन्डपन केर परब नियरे रहा।³यहिते ऊके भाइन वहिते कहिन इहां ते कूच करिकइ यहूदियन म जाउ, काते ते जउन कामु तू करत हओ उनहुन केर तोहरे चेलेउ देखइ।⁴काहे ते अइसन कउनउ मनई न होई जउन परसिद्ध हो केर चाही अउर छिपि कइ कामु करई अगर तू ई कामु करत हइ तउ अपन तई जगत पइहन परगट करउ।⁵काहे ते वहिके भाइउ ऊ पर बिसवासु नाई करत रहइ।

⁶तबइ यीसु उनहुन ते कहिन कि हमार समय अबही तक नाहि आवा, पर तोहरे खातिर सबइ समय हइ।⁷जगतु तोहिते बैरु नाई करि सकत, पइ ऊ हमते बैरु करत हइ काहे ते हम ऊ के विरोध म गवाही देइत हइ कि ऊके काम नीक नाहि हइ।⁸तुम पूरब म जाउ हम अबही ई परब म जाई जाइत अबहिन तलक हमार समय पूर नाई भवा।⁹ऊ वहिते ई बातन केर हि कइ गलील म रहि गवा।

¹⁰पर जबइ ऊके भाई परब म चले गए तब ऊ

खुदइ परगट म नाई पइ मानउ गुपुत हइ कइ गवा।¹¹यहिते यहूदी परब म वहिका ई कहिकइ दूढ़इ लागे कि ऊ कहां हइ?

¹²अउर लोगन म वहिके बारे म चुपके-चुपके बहुतइ बातइ भई कितनइ कहत रहइ कि ऊ नीक मनई हइ अउर कितनेइ कहति रहइ कि ऊ मनईन केर नाइ भरमावति हइ।¹³तबहू यहूदिन केर भय म कउनउ मनई वहिके बारे म खुलि कइ नाई बोलति रहइ।

यीसु परब मा सिच्छा देत हय

¹⁴अउर जबइ परब केर आधे दिन बीति गये तबइ यीसु मंदिर जाइके उपदेसु करइ लाग।¹⁵तब यहूदियन अचरज करिहइ कहिन कि इहि का बिनु पढ़इ ग्यानु कइसे आइ गवा।

¹⁶यीसु जबाबु दिहिन कि हमार परवचन हमार नाई पर हमरे भेजइ वाले केर हइ।¹⁷अगर कउनउ ऊ की इच्छा पे चलइ चाहत तउ ऊ ई परवचन केर बारे म जानि जाई कि ई परमेसुर कि तरफ ते हइ या हम अपन ओर ते कहित हइ।¹⁸जउन अपन ओर ते कुछ कहत हइ ऊ अपन बड़ाई चाहत हइ। पर जउन अपन केर भेजइ वालेइ कि बड़ाई चाहत हइ उहइ सच्चा हइ अउर वहिमा अधरम नाई हइ।¹⁹का मूसा तोहिका बेवस्था नाई दिहिस? तउ तुम मा ते कउनउ मनई बेवस्था के नाई चाहत, तुम काहे मोहिका मारि डाले क चाहत हउ?

²⁰उइ लोगन जबाबु दिहिन कि तोहि म दुस्ट आतमा हइ कै तोहिका मारि डारइ केर चाहत हइ।

²¹यीसु उन्हेका जबाबु दिहिन कि हम एकै कामु कीन हइ अउर तुम सबइ अचम्भा करत हउं²²यहिते मूसा तुम्हका खतना केर आग्या दिहिस हइ ई नाई कि ऊ मूसा केर ओर ते हइ पर ई पुरखन ते चलत आवत हइ, अउर तुम सबत के दिनइ मनई का खतना करत हउ।²³जब सबत केर दिन मनई केर खतना कीन जात हय जेहिते मूसा केर बेवस्था का आग्या टलि न जाइ तउ तुम मोहि पे वहिते विरोधु करति हउ कि हम सबत केर दिनइ याक मनई क पूरी तरह चंगा कि हेन? ²⁴मुंह देखि कइ नियाव न चुकाउ, पर ठीकइ ठीक नियाउ चुकाउ।

का यीसु ही मसीह हय?

²⁵तब कितनेइ यरुसलेमी कहइ लाग का इ वहइ नाई, जेहिके मारि डारइ क परयतन की जाति रहइ।

²⁶पइ देखउ, ऊ तो कइसन खुल्ला बतियात हइ,

अउर कउनउ ऊते कुलु नाई कहत का ई समय हइ कि सरदारन सच—सच लिहिन हइ कि इहइ मसीह हइ? ²⁷ई का तउ हम जानित हइ कि ई कहां केर हइ पर मसीह अबइ अइहइ तउ कउनउ न जानिहइ कि ऊ काह केर हइ?

²⁸तबइ यीसु मंदिर म परवचन देत समय पुकारि के कहिस तुइ हमका जानत हउ अउर इहउ जानत हउ कि हम होई तुम तउ खुदइ नाई आयन पर हमार भेजइ वाला सच्चा हइ ऊ का तुम नाई जानत हउ। ²⁹हम वहिका जानित हइ काहे ते हम वहिकी ओर ते हन अउर उहइ हमका भेजिसि हई।

³⁰ई पइ उनहुन ऊ का पकड़इका चाहिन तउ कउनउ ऊ प न डारिसि काहे ते वहिका समउ अबही तक नाई आवा रहइ। ³¹अउर भीड़ म ते बहुतेरेन ऊ पर बिसवासु किहिन, अउर कहइ लाग कि मसीह जबइ अइहइ तबइ का इहते अधिकइ अचरजु दिखाई जउन ऊ दिखाइसि?

³²फरीसियन लोगन केर ऊ के बारे मा ई बातन केर चुपकइ—चुपकइ करत सुनिन, अउर महायाजके न अउर फरीसियन ऊ का पकरइक सिपाही भेजिन।

³³ई पइ यीसु कहिन, हम थोड़ेइ देर तलक अउर तोहरे साथेइ हन, ओकरे बादइ हम आपन भेजइ वाले केर पास चले जाइव। ³⁴तुम मका दुड़िहउ पर तुम हमका नाई पइहउ, अउर जहै हम हन उहां तुम नाई आइ सकत हउ।

³⁵यहूदिन आपस म कहिन ई कहां जाई कि हम ईका नाई पइबे? का ऊ उन्हेके पास जाई जउन यूनानिन म तितर—बितर होइके रहत हइ। अउर यूनानिनउ केर परवचन सुनइ हई। ³⁶ई का बातहइ जउन ऊ कहिस कि तुम हमका दुड़िहउ पर न पइहउ अउर जहां हम रहव।

³⁷फिरि परब केर आखिरी दिनउ जउन परब केर खास दिनु हइ यीसु ठाढ़ भवा अउर पुकारि के कहिस, अगर कउनउ पियासा होय तउ ऊ हमरे पासइ आइ के पियइ। ³⁸जउन हमरे प बिसवासु करिहइ जइस पवित्र सास्तर म आवा हइ कि ओके हिरदय म ते जीवनु केर जल केर नदिया बहि निकसी। ³⁹ऊ ई बचनु उइ आतमा के बारे म कहिस जेहिका ऊ पइ बिसवासु करइ वाले पावइ प रहइ सकत हइ। काहे ते आतमा अबइ तलक नाई उतरी रहइ काहे ते यीसु अबहिन तलक अपनु पहियक नाई पहुंचा रहइ।

⁴⁰तब भीड़ म ते कउनउ—कउनउ ई बातइ सुनिकइ कहिन सचमुचइ इहइ नबी हई।

⁴¹दुसरेउ कहिन ई मसीह हइ पर कउनउ कहिस कि का मसीह गलील ते अइहे? ⁴²का पवित्र सास्तर म ई नाई आवा कि मसीह दाउद केर बंस ते अउर बेतलहम केर गांव ते अइहई जहां दाउद रहत रहइ? ⁴³यहिते ऊ के कारन लोगन म फूटि पड़ि गवा। ⁴⁴उनमा ते कितनेइ उइका पकरइ केर चाहत रहइ, पर कउनउ वहि पइ हाथु नाई डारिसि।

यहूदी धरम गुरुवन केर अविस्वास

⁴⁵तबइ सिपाही महायाजकन अउर फरीसियन केर पासइ आये अउर उइ वहिते कहिन, उइ ऊ का नाई पकरि सके।

⁴⁶सिपाहिन जबाबु दिहिन कि कउनउ मनई कबहू ऐसि बातइ नाई किहिन।

⁴⁷फरीसियन उनकउ जबाबु दिहिन, कि का तुइउ भरम म पड़ि गयेउ हओ? ⁴⁸का सरदारन या फरीसियन म ते कउनउ उहि पइ बिसवासु किहिस हइ? ⁴⁹पर ई मनई जउन वेवस्था नाई जानति।

⁵⁰नीकु देस म जउन पहिलेइ ई ऊ के पासइ आवा रहइ अउर उनमा ते याक रहइ, उनहुन ते कहिसि।

⁵¹का हमरी वेवस्था कउनउ मनई क जबइ तलक पहिलेइ वहिका सुनिकइ जानि न लेइ कि ऊ का करत हइ, दोसी ठहरावत हइ?

⁵²वै उनका जबाबु दिहिन, का तुमहू गलील का हइ? दूढ़उ अउर देखउ कि गलील ते कउनउ नव परगट नाई होई का ⁵³तबइ सबइ जने अपन—अपन घरन केर चले गे।

8पर यीसु जैनूतन केर पहारु पइहन गये। ²अउर भोरइ केर फिरि मंदिर म आइ गए अउर सबइ लोग उइके पासइ आइ जात अउर ऊ बइठ के उपदेसु देइ लागे। ³तबइ सास्तरी अउर फरीसी एक अउरत केर लइ आए जउनु बेभिचारु म पकरी गई रहइ अउर ऊ का बीच म ठढ़ि करि कइ यीसु ते कहिन। ⁴हे गुरु ई, अउरत दुराचारु करत पकरी गई हइ। ⁵धरम वेवस्था म मूसा हमका आग्या दिहिन हइ कि अइसन अउरतन केर पत्थरवाह करइ। तउन तुम ई अउरत के बारे म का कहत हउ? ⁶उनहुन ऊ का परखइ की खातिर कउनउ बात पावइ। पर यीसु झुकि कइ धरती पै उंगली ते लिखइ लाग। ⁷जबइ उइ ऊ ते पुछतइ रहइ तबइ ऊ सीधेइ हुइ कइ वहिते कहिसि कि तुइ मा जउन कउनउ पापु नाई किहिस हइ उहइ पहिले ऊ का पत्थर मारइ। ⁸अउर फिर झुकि कइ धरती प अँगुरी ते लिखइ लाग।

⁹पर उइ ई सुनिकइ बडेन ते लइकइ छोटैन तलक याक याक करि निकलि गये। अउर यीसु अकेलेउ रहि गवा हे। अउर मेहरारु उहइ बीच म टाढ़ि रहि गई।
¹⁰यीसु सीधेइ हुइ कइ ऊ ते कहिन हे अउरत उइ कहां गये? का कउनउ तोहि पइ दंडु का आग्या नाई दिहिस।

¹¹हे परभु, कउनउ नाई यीसु कहिन हमहूँ तुइ का दंडु केर आग्या नाई देइत, जाउ अउर फिरि ते पापु न किएउ।

यीसु केर गवाही केर सच्चाई

¹²तबइ यीसु फिरि ते लोगन ते कहिन जगत की जोति हमहिन, जउन हमरेइ पाछेइ हुइ लेइ ऊ अन्धकारु म नाई चलत हइ। पर जीवन केर जोति पइहइ।

¹³फरीसियन उइते कहिन तुइ अपन गवाही अपनेइ आपइ देति हइ, तोहार गवाही नीकु नाई।

¹⁴यीसु ऊ का जबाबु दिहिस कि अगर हम अपन गवाही अपनेइ आप देइत हइ तबहूँ हमार गवाही नहीं हइ। काहे ते हम जानित हइ कि हम केहर ते आइत हइ अउर केहर तक जाइत हइ।¹⁵तू सरीर के अनुसारइ नियत करति हय। हम कउनउ केर नियाउ नाई करिन।¹⁶अउर अगर हम नियाउ न करबिउ करी, तउ हमार नियाउ सांच हइ काहे ते हम अकेले नाई, पर हम हन अर हमार बापु हई। जउन हमका भेजिन हइ।¹⁷अउर तोहरी बेवस्थउ म लिखउ हइ कि दुइ मनईन केर गवाही मिलि कइ सही होत हइ।¹⁸याक तउ हम खुदइ अपन गवाही देइत हइ, अउर दुसरे बापु हमार गवाही देत हइ जउन हमका भेजिस हइ।

¹⁹उइ वहिते कहिन तोहार बापु कहां इह? यीसु जबाबु दिहन क न तउ तुम हमका जानति हउ, न हमार बापु कयहन, यदि हमका जानत हउ तउ हमार बापु केर जानत हउ।²⁰ई बातन केर ऊ मन्दिर मा उपदेसु देति भये भंडार गरहइ म कहिन, अउर कउनउ वहिका नाई पकरिसि, काहे ते ऊ का समय अबहिन तलक नाई आवा रहइ।

²¹ऊ वहिते फिरउ कहिस, हम जानित हइ, अउर तुम मोहिका ढुढ़िहउ अउर अपन पापन म मरिहउ। जेहि ओर हम जाइत हइ उहां तुम नाई आइ सकत हउ।

²²इह पर यहूदिन कहिन काउ अपन आपइ केर मारि डारी जउन कहत हइ कि जेहर हम जाइत हइ उहइ तुम नाइ आइ सकतेव?

²³ऊ वहिते कहिस, तुम नीचेइ के हउ, हम ऊपरि

के हन, तुम संसार के हउ हम संसार के नाई हन।
²⁴यहिते हम तुइते कहित हइ, कि तुम अपन पापइ मं मरिहउ काहे ते तुम अगर बिसवासु नाई करिहउ कि हम उही हन, तउ अपन पापन म मरिहउ।

²⁵उई ऊ ते कहिन, तुइ कउन हौ? यीसु उइते कहिन उहे हन जउन सुरुइते तुमते कहित आएन हइ।

²⁶तोहरे बारे मां हमका बहुत कुछ कहइ के अउर फइसलउ करइक हइ, पर हमार भेइ वाल सच्चा हइ अउर जउन हम ऊ ते सुनिन हइ उहइ जगत ते कहित हइ।

²⁷उइ नाई समझिन कि हमते बापु के बारे म कहति हइ।²⁸तबइ यीसु कहिन कि जबइ तुइ मनई के बेटवा केर ऊंचेइ पै चढ़इ हउ जानि हउ कि हम वही हन। अउर अपन आय ते कछु नाई करिति, पर जइसन हमार बापु हमका सिखाइन वइसन ई बातन केर कहत हइ।²⁹अउर हमार भेइ वाल हमरे साथेइ हम, ऊ हमका अकेलइ नाई छोड़िस हइ, काहे ते हम सदइ ते कामु केर करति हइ, जेहिते ऊ परसन होत हइ।³⁰ऊ ई बातन केर कहिय रहा रहै कि बहुतेरेइ उइ परे बिसवासु किहन।

अबराम केर सन्तान

³¹तबइ यीसु उइ यहूदियन ते जउन ऊ की बिसवासु कहिन रहइ कहिन, जो तम हमार बचन म बनेइ रहि हउ, तउ सच्चेइ हमार चेला ठहरिहउ।
³²अउर सांच केर जनिहउ, अउर सांच आजाद करिहइ।

³³उइ ऊका जबाबु दिहिसिकि हम तउ अबराम केर बंस ते हन, अउर कबहूँ कउनउ के साथे नाई भयेन, फिरि तुइ काहे ते कहित हइ कि तुइ आजाद हइ जइहो?

³⁴यीसु उनका जबाबु दिहिन, हम तुइते सांचइ सांच कहित हइ कि जउन कउनउ पापु करति हइ, ऊ पापइ केर दासउ हइ।³⁵अउर दासु सदइ घरई मा नाई रहति, बेटवा सदर रहत हइ।³⁶यहिते अगर बेटवा तू का आजाद करि हइ, तउ सच्चेइ तू आजाद हुइ जाइहौ।³⁷हम जानित हइ कि तुइ अबराम केर बंसइ ते हउ, तउ हमार बचन तो हरे हिरदय म बैरु नाई पावति, यहिते तुम मोहिका मारि डारइ चाहत हओ।
³⁸हम तोसे वहइ कहति हउ जउन अपन बापु के इहां देखेन हइ, अउर तुम उहइ करत हउ जउन तुम अपन बापु ते सुनेउ हउ।

³⁹उइ उन्हका जबाबु दिहिन कि हमार बापु तउ अबराम हइ: यीसु उन्हते कहिन, जौ तुम अबराम केर

बेटवा हउ तउ अबराम की तरह काम करउ।⁴⁰पर अब तुम हम जइसन मनई क मारि डारइक चाहत हउ जउन तुम का ऊ सांचु बचनु बताइसि जउन ऊ परमेसुर ते सुनिसि। ई तउ अबराम नाई कहिसि रहइ।⁴¹तुम अपन बापु केर समानइ कामु करति हउ। उइ ऊते कहिन कि हम दुराचार ते नाई जनमें। हमार याक बापु हइ जानी परमेसुर।

सैतान केर सन्तान

⁴²यीसु ऊते कहिन, जो परमेसुर तोहार बापु होत तउ मोहिते परेन राखतेउ काहे ते हम परमेसुर म ते निकरि कइ आयेन हइ, हम खुदइ नाई आएन पर उन्हे हमका भेजिस।⁴³तू हमार बात केर काहे नाई समझति? यहिते कि हमार बचनु सुनिनाई सकति।⁴⁴तुइ अपने बाप सैतानु ते हउ अउर अपन बापु कइ इच्छा केर पूर करइक चाहति हउ। ऊ तउ सुरुइ ते हत्यारा हइ। अउर सांचु प नाई टिका रहा। काहे ते सांचु उहिमा हइयइ नाई, जबइ ऊ झूठ बोलति तउ अपन सुभाउते बोलति हइ, काहे ते ऊ झूठा हइ, बल्कि झूठ क बापुइ हइ।⁴⁵पर हम जउन सांचइ बोलति हइ, यहिते तुम हमार परतीति नाई करति हइ।⁴⁶तुममा ते कउन मोहिका पापी ठहरावति हइ? अउर जो हम सांचइ बोलति हइ तउ ऊ हमार परतीति काहे नाई करति हइ? ⁴⁷जउन परमेसुर ते होति हइ, ऊ परमेसुर की बातइ सुनति हइ, अउर तुइ यहि लिए नाई सुनति कि परमेसुर की ओरइ ते नाई हओ।

यीसु केर दावा अपन बिसय मां

⁴⁸ई सुनि यहूदियन ऊ ते कहिन, का हम ठीकइ नाई कहित, कि तू सामरी हइ अउर तोहिमा दुस्ट आतमा हइ।

⁴⁹यीसु जबाबु दिहिन, कि मोहिका दुस्ट आतमा नाई, पर हम अपन बापु केर आदरू करत हइ, अउर तू हमार निरादर करत हउ।⁵⁰हम अपन परतिस्था नाई चाहित, हां याक तउ हइ जउन चाहत हइ अउर नियाउ करत हइ।⁵¹हम तुमते सांचइ साँच कहित हइ, कि अगर कउनउ मनई हमार बचनु प चलिहइ तउ ऊ हमेसइ तलक मिरतु केर न देखि पइहइ।

⁵²यहूदियन ऊ ते कहिन कि अबइ तउ हम जानि लिहेन हन कि तुइमां दुस्ट आतमा हइ। अबराम मरि गवा अउर नबीउ मरि गये हइ अउर तू कहति हइ कि अगर कउनउ हमार बचनु पै चलिहइ तउ ऊ हमेसा तलक मिरतु क सवाद न चखिहइ।⁵³हमार बापु अबराम तउ मरि गवा का तू औरो बड़ा हओ? अउर

नबिउ मरि गये, तू अपन आपका का ठहरावति हओ।

⁵⁴यीसु जबाबु दिहिन अगर हम खुदइ अपन महिमा करी तउ हमारि महिमा कछू नाई, पइ हमारि महिमा करइ वाला हमार बाप हइ, जेहिमा तुइ कहत हइ कि ऊ हमार परमेसुर आय।⁵⁵अउर तुम तउ वहिका नाई जानेव, पर हम वहिका जानित हइ अउर अगर कही कि हम वहिका जानित हइ अउर अगर कही कि वहिका नाई जानति, तउ हम तोहरी नाई झूठइ ठहरिबे, पर हम उइका जानति हइ अउर उइके बचनु पै चलति हइ।⁵⁶तोहार बापु अबराम हमार दिनउ देखइ कि आस म बहुतइ मगन रहइ अउर ऊ देखिसि अउर मगन भवा।

⁵⁷यहूदियन ऊ ते कहिन, अबइ तलक तुइ पचास बरस केर नाई, फिरउ तुइ अबराम केर देखेव हओ।

⁵⁸यीसु ऊ ते कहिन, हम तोसे सांचइ—सांच कहति हइ कि पहिले अबराम जनम भवा हम रहेन।⁵⁹तबइ उनहुन उइका मारइ के खातिर पत्थर उठाइनि, पर यीसु छिपि कइ मंदिर ते निकरि गे।

यीसु एक जनम केर अन्धे केर परकास देइत हय

9 फिरि जाति भये ऊ याक मनई क देखिस जउन जनम क अन्धा रहइ।²अउर ऊ के चेलन ऊ ते पूछिन हे रब्बी कउनइ पापु किए रहइ कि ई अन्धई जनमा, ई मनई या ई केर माइ बाप।

³यीसु जबाबु दिहिन न तउ ई पाप किहिस रहइ अउर न ई के माइ—बाप पर ई इह खातिर भवा कि परमेसुर के काम उइ मा परगट होय।⁴जउन हमका भेजिस हई, ऊ के काम दिन हि दिन म करब जरूरी हइ ऊ राति आवइ वाली हइ जेहिमा कउनउ काम नाहीं करि सकति।⁵जबइ तलक हम इ दुनिया म हन तबइ तलक जगत कि जोति हन।

⁶ई कहि कई ऊ भूमि पर थूकिसि अउर उइ थूक ते मिट्टी क सानिसि अउर उइ मिट्टी क उइ अन्धे कि आखिन पे लगाई कइ।⁷ऊ ते जाये केर सीलोल केर कुंड म धोइ ले (जेहिमा भेजइ भवा हइ) तउन उइ जाइ के धोइसि अउर देखति भवा लौटि आवा।

⁸तबइ पड़ोसिन अउर जिनहुन पहिले ऊका भीख मांगत देखिन रहइ कहइ लाग का ई वहइ नाई जउनु बइठा भीख मांगत रहइ? ⁹कितनेउ कहिन ई उहइ हइ अउरन कहिन नाई, पर ऊ केर तरह हइ ऊ कहिसि, हम उहइ हइ।

¹⁰तबइ उइ ऊते पूछइ लागि, तोहरी आंखी काहे ते खुलि गई।

¹¹ऊ जबाबु दिहिसि कि यीसु नाम का याक मनई

मिट्टी सानिसि अउर हमरी आखिन प लगाइ कइ हमते कहिसि कि सीलोम जा के धोइ लेउ, तउन हम गएन, अउर धोइ के देखइ लागेन।

¹²उइ ऊ ते पूछिन, ऊ कहाँ हइ? ऊ कहिसि, हम नाई जानित।

फरीसियन चंगाई केर बारे मा जांच पड़ताल

¹³लोग ऊ ते जउन पहिले अंधरा रह, फरसिन के पासइ लइ गए। ¹⁴जेहि दिन भी यीसु मिट्टी क सानि कइ ऊ की आखिन का खोलि रहइ ऊ सबत का दिनु रहइ। ¹⁵तबइ फरीसिनउ ऊ ते पूछिन तोहरी अखिया कउन रीतिइ ते खुलि गइ उइ वहिते कहिसि, ऊ हमरी आखिन प मिट्टी लगाइसि फिर हम धोइ लिहेन अउर अब तउ देखित हउ।

¹⁶ई पइ कइयउ फरीसीयन कहइ लाग, ई मनई परमेसुर की ओर ते नाइ काहे ते ऊ सबद का नाहीं मानत तनु दिनु नाई मानति अउर ऊ कहिन पापी मनई कइसे अइस चीन्ह दिखाइ सकति हइ? यहिते उनमा फूट परि गई।

¹⁷उइ ऊ अंधरा ते फिर कहिन, उइ तउ तोहरी आखिन क खोलिसि तू उइ के बारे म का कहति हइ? ऊ नबी हइ।

¹⁸पर यहूदिन क बिसवासु नाई भवा कि ई आंधर रहइ अउर अब देखति हइ। जबइ तलक उनहुन ऊ के माई बापु केर जेहिकी आंखी खुलि गइ रहइ बुलाइ कइ। ¹⁹उन्ह ते पूछिन का ई तोहार बेटवा हइ जेहिका तुम कहति हउ कि अंधरा जनमा रहइ? फिरि अब ऊ कइसे देखति हइ?

²⁰ऊ के माइ—बापु जबाबु दिहिन हम तउ इ जानिति हइ कि ई हमार बेटवा हइ अउर अंधरइ जनमा रहइ। ²¹पर हम इउ नाई जानिति कि अब कइसेइ देखति हइ, अउर न ई जानिति हइ कि कउनेइ ऊ की आखिन क खोलिन, ऊ सयान हइ ऊ ते पूछि लेउ, ऊ अपन विसय म खुदइ कहि देई। ²²ई बात उइके माइ—बापु यहि ते कहिन, काहे ते उइ यहूदियन ते डरति रहइ, काहे ते यहूदी एका करि चुकेइ रहइ कि अगर कउनउ कहइ कि ऊ मसीह हइ, तउ आराधनालय ते निकाल दिया जाय। ²³ई कारन ऊ के माइ—बापु कहिन कि सयान हइ उही ते पूछि लेव।

²⁴तबइ उइ ऊ मनई क जउन अंधरा रहइ, दूसरी बेर बुलाइके ऊ ते कहिन, परमेसुर की पराथना करउ, हम तउ जानिति हइ ऊ मनई पापी हइ।

²⁵ऊ जबाबु दिहिस हम नाइ जानिति कि ऊ पापी हइ या नाइ हम याक बात जानित हइ कि हम

अंधरा रहन अउर अब देखित हइ।

²⁶उइ ऊ ते फिरि कहिन कि उइ तोहरे साथइ का किहिस? अउर जउन तरह ते तोहरी आखिन का खोलिस।

²⁷ऊ उइते कहिसि, हम तउ तुम ते कहि चुकेन अउर तुम नाई सुनेउ अब दूसरी बार का सुनइ का चाहति हउ? का तूमहू उहि के चेला बना चाहति हउ का।

²⁸तबइ उइ उहिका बुरा भला कह कइ बोले तू तउ उहिका चेला हओ, हम तउ मूसा के चेला हन। ²⁹हम जानित हइ कि परमेसुर मूसा ते बातइ किहिस पर हमई मनई केर नाई जानिति कि कहाँ केर हइ?

³⁰ऊ उनहुन केर जबाबु दिहिस ई तउ अचम्भा कि बात हइ कि तुइ नाई जानति कि ऊ कहाँ काहइ तउ ऊ हमरी आखिन क खोलि दिहिसि। ³¹हम जानित हइ कि परमेसुर पापिन कि नाई सुनति। अगर कउनउ परमेसुर क भगत हइ अउर ऊ की इच्छा पै चलति तउ ऊ ऊकी सुनति हइ। ³²जगत के सुरुवइ ते ई कबहूँ सुनइ क नाई आवा कि कउनउ जनम केर आंधर मनई केर आखिन खोलिसि होय। ³³अगर इह मनई परमेसुर क ओर ते नाई रहिते तउ कुछउ नाई करि सकत।

³⁴उनहुन ऊ का जबाबु दिहिन कि तुइ तउ बिलकुलइ पापन मा जनमा हइ। तू हमका का सिखावति हइ? अउर उइ ऊ का बाहेर निकार दिहिन।

आतमिक आंधरपन

³⁵यीसु ई सुनिन कि उइ उइका बाहर निकाल दिहिन हइ अउर जबइ ओसे भेंट भई तउ कहिन कि का तू परमेसुर के बेटवा प बिसवासु करत हउ?

³⁶ऊ जबाबु दिहिस कि हे परभु ऊ कउन हइ कि हम उइ पइ बिसवासु करी।

³⁷यीसु ऊ ते कहिन, तू वहिका देखव हओ अउर जउन तोहरे समुहे बात करत हइ, वहइ हइ।

³⁸ऊ कहिसि, हे परभु हम बिसवासु करति हइ, अउर ऊ का दन्डवत करति हइ।

³⁹तबइ यीसु कहिन हम ई जगत म नियाउ करइ क खातिर आयेन हन जेहिते जउन नाई देखत हइ उइ आंधर हुए जाय।

⁴⁰जउन फरीसीसी ऊ के साथइ रहइ उइ बातन सुनि कइ ऊ ते कहिन का हमहूँ आंधर हन?

⁴¹यीसु वहिते कहिन अगर तुम आंधर रहेव तउ पापी न ठहरतेउ। पर अब तू कहत हओ कि देखित हइ यहिते तोहार पापु बनइ रहति हइ।

चरवाहा अउर ओकरी भेड़न

10 हम तोहिते सांचइ—सांच कहित हइ कि जउन कउनउ दुआरे ते भेड़साला म परवेस नाइ करति पर अउरउ कउनउ डगर ते चढ़ि जाति हइ, ऊ चोर अउर डाकू हइ।²पर जउनदरवाजे ते भीतर परवेस करति हइ, ऊ भेड़न केर चरवाहा हइ।³ऊ केर खातिर दुआरपाल दुआर केर खोल देत हइ अउर भेड़इ ऊका सबद सुनती हई अउर ऊ अपन भेड़न का नामु लइ—लइ बुलावति हइ अउर बाहर लइ जाति हइ।⁴अउर जबइ ऊ अपन सबइ भेड़न क बाहर निकारि चुकति हइ तबइ उइके आगेइ आगे चलति हइ अउर भेड़इ उइके पाछे—पाछे हुइ लेती हई, काहे ते उइ का सबद पहिचानित हई।⁵पइ उइ पराय केर पाछे नाई जइहई, पर उइते भागि हई काहे ते उइ परायन क सबद नाई पहिचानित हई।⁶यीसु उइते ई उदाहरन कहिन, पइ उइ न समझे कि इ क बातइ हइ जउन ऊ हमते कहति हइ।

⁷तबइ यीसु उइते फिरिते कहिन, हम तुइते सांची—सांची कहित हइ कि भेड़न का चरवाहा हन मन।⁸जितनेइ हमते पहिलेइ आए, उइ सबइ चोर अउर डाकू हई पर भेड़न उइकी नाइ सुनिन।⁹दरवाजा हम हन, अगर कउनउ हमारेइ जरिये भीतर परवेस करि हई तउ उद्धार पइहई, अउर भीतर—बाहर आवा जाही करी अउर चारउ पाई।¹⁰जे कउनउ अउर काम के खातिर नाई पइ केवल चोरी करइ क अउर घात करइ क, अउर नामु करइ क आवति हई। हम ई खातिर आएन की उइ जीवनु पावइ अउर बहुताइत ते पावई।

¹¹हम नीक चरवाहा हन, नीक चरवाहा भेड़न केर खातिर अपन परान देति हइ।¹²मजदूर जउन न चरवाहा हइ अउर न भेड़न के मालिक भेड़िया केर आवति भये देखि, भेड़न केर छोड़ि कइ भागि जाति हइ, अउर भेड़िया उइका पकरति अउर तितर—बितर करि देत हइ।¹³ऊ ई खातिर भागि जाति हइ कि ऊ मजदूर हइ अउर उइका भेड़िन कि चिन्ता नाई।

¹⁴नीक चरवाहा तउ हम हन, जउन तरह बाप हमका जानत हए, अउर हम बाप केर जानिति हइ।¹⁵अइसन हम अपन भेड़न क जानिति हइ अउर हमरी भेड़इ हमका जनती हइ। अउर हम भेड़न केर खातिर अपन परान देइति हइ।¹⁶अउर हमरी अउरउ भेड़इ हई जउन ई भेड़ वाले कि नई, हमका उनहुन का लाउबु जरूरी हइ, वह हमार सबद सुनि हइ तबइ याकइ झुंड अउर याकइ चरवाहा होई।¹⁷बाप यहिते मोहिते परेम राखति हइ कि हम अपन परान देइत हइ

कि उइका फिरि ते लइ लेई।¹⁸कउनउ हमते उइका छीनत नाई, बल्कि हम ऊका अपनेइ ते देखति हइ। मोहिका ऊ का देइ का अधिकार हइ; ई हुकुम हमका अपने बापन ते मिला हइ।

¹⁹ई बातनि के कारन यहूदियउ म फूटि परि गई।²⁰उइहमा ते बहुतेरेइ कहइ लाग कि वहिमा दुस्त आतमा हइ, अउर ऊ पागल हइ, उइकी काहे सुनति हउ?

²¹अउर ऊ कहिन, ई बातइ एइसन मनई कि नाई हइ, जिन्हमा दुस्त आतमा होई, का दुस्त आतमा अधरन कि आखिन का खोलि सकति हई?

यहूदियन केर अबिसवासु

²²यरूसलेम मा समापन परव भवा अउर जाड़े केर समय रहइ।²³अउर यीसु मंदिर मं सुलेमान केर ओसारे म टहलत रहइ।²⁴तबइ यहूदियन आइ कइ ऊ का घेरिन अगर तुई हमरे मन का कबइ तलक दुविधा म रखहउ अउर तइ मसीह हइ तउ हमते साफइ—साफ कहि देउ।

²⁵यीसु उइका जबाबु दिहिन कि तोहिते कहि दिहिन अउर तुइ बिसवासु करतइ नाई जउन काम हम अपन बापु केर नाम ते करति हई, वही हमार साच्छी हइ।²⁶पइ तुइ इहि कारन बिसवासु नाई हउ काहे ते तुम हमारि भेड़न म ते नाइ हउ।²⁷हमारि भेड़इ हमार सबद सुनत हई अउर हम उइका जानित हइ अउर उइ पाछेइ—पाछे चलती हइ।²⁸अउर हम उइका हमेसा को अपारु जीवनु देइत हइ, अउर उइ कबहू नामु नाई होइ हई अउर कउनउ उइका हमार हाथन ते छोरी नाई लेइ।²⁹हमार बापु जउन उइका मोहिका दिहिस हइ, सबते बड़इ हइ। अउर कउनउ उइका बापु के हाथ ते छीन नाई सकत।³⁰हम अउर बापु याकइ हइ।

³¹यहूदियन वहिका पथरवाह कइ इक फिर पाथर उठाइन।³²ई यीसु उइते कहिन कि हम तुइका अपन बापु की तरफ ते बहुतइ भलेइ कामु दिखाएन हइ। पइ परमेसुर की निन्दा के कारन अउरइ खातिर कि तू मनई हुइ कइ अपन आप क परमेसुर बतावति हइ।

³³यहूदियन उइका जबाबु दिहिन कि हम भले कामन के खातिर तोहिका पाथरवाह नाई करति हइ। पइ परमेसुर की निन्दा के कारन अउरइ खातिर कि तू मनई हुइ कइ अपन आप क परमेसुर बतावति हइ।

³⁴यीसु उइका जबाबु दिहिन का तोहरी धरम के बेवस्था म नाई लिखा हइ कि हम कहेन, तुई परमेसुर हइ? ³⁵अगर ऊ उइका परमेसुर कहिसि, जिन्ह केर

पासइ परमेसुर क वचनु पहुँचा अउर पवित्तर सास्तर कि बातइ क लोपु नाई हुई सकति।³⁶तउ जेहिका बाप पवित्तर ठहराइ कइ जगत म भेजिसि, ऊ ते तुम कहति हउ कि तू निन्दा करति हइ, यहिते कि हम कहेन कि हम परमेसुर केर बेटवा हन।³⁷अगर हम आपन बाप क काम नाई करति हइ तउ हम पर बिसवासु न करउ।³⁸पइ अगर हम करति हइ, तउ चाहइ हमरी बिसवासु नाई ऊ करउ पइ उइ कामन की बिसवासु करउ। तुइ जानउ अउर समझउ कि बाप मोहिमा हइ, अउर हम बाप म हन।³⁹तबइ उइ फिरि ते ऊ का पकरइ क परयतन किहिन पइ ऊ उन्हे के हाथ ते निकर गवा।

⁴⁰फिरि ऊ यरदन केर पार उइ ठउर प चलइ गवा, जहां यहून्ना पहिले बपतिसमा दीन करति रहइ अर उहइ रहउ।⁴¹अउर बहुतेरे उइके पासइ आइके कहिन, कि यहून्ना तउ कउनउ चीन्ह नाई दिखाइसि, पइ जउन कछु यहून्ना ई के बारे म कहिस रहइ, ऊ सबइ सांचु रहइ।⁴²अउर उहां बहुतेरेन उइ पइ बिसवासु किहिन।

लाजर केर मउत

11 मरियम अउर उइकी बहिन, मारथा केर गांव बैतनियाह मा लाजर नामक याक मनई बीमार रहइ।²ई उहइ मरियम रहइ जउन परभु पहिलेनि इतर डारिकइ उइके गौड़वन क अपन बालन ते पोंछिस रहइ। यही का भाई लाजर बीमार रहइ।³यहिते ऊ की बहिनऊ कहलाइ भेजिन कि हे परभु, देखउ, जेहिते तू परतीति करत हइ ऊ बीमार हइ।

⁴ई सुनिकइ यीसु कहिन, ई बीमारी मउत कि नाई, पइ परमेसुर कि महिमा के खातिर हइ कि उइके जरिए परमेसुर केर बेटवा कि महिमा हइ।⁵अउर यीसु मारथा अउर ऊ की बहिन अउर लाजर ते परेमु राखति रहइ।⁶यहिते जबइ ऊ सुनिसि कि उइ बीमार हइ, तउ जेहि जगह पे ऊ रहइ उहां दुइ दिन अउर ठहरि गवा।

⁷फिरि ई के बादइ ऊ चेलन ते कहिस कि आउ, हम फिरि यहूदिया केर चली।

⁸चेलन उइते कहिन, हे रब्बी, अबइ तउ यहूदी तुइका पत्थरवाह करइ क चाहति रहइ अउर का तुइ तबहूँ उहर जाति हइ?

⁹यीसु जबाबु दिहिन, का दिन म बारह घंटा नाई होत? अगर कउनउ दिन केर चलइ तउ ठोकरु नाई खाति, काहे ते ई जगत केर उजियार देखइक हइ।¹⁰पइ अगर कउनउ रातेक केर चलइ, तउ ठोकर

खाति हइ? काहे ते ऊ मा परकास नाई।

¹¹यीसु ई बातइ कहिन, अउर ऊ केर बादि उइते कहइ लाग कि हमार मित्तर लाजर सोइ गवा हइ, पर हम उइका जगावइ जाइति हइ।

¹²तबइ चेलन ऊ ते कहिन हे परभु अगर ऊ सोइ गवा हउ तउ उइ बचिउ जाई।¹³तउ यीसु ऊ की मिरतु केर बारे म कहिन रहइ, परइ उइ समझेइ कि यीसु ऊ नींद म सोई जाइ केर बारे म कहिन।

¹⁴तबइ यीसु उइते साफइ कहि दिहिन कि लाजर मरि गवा हइ।¹⁵अउर हम तोहरे कारन परसन हन कि हम उहां नाई रहन जेहिते तुम बिसवासु करउ पइ, अब आवउ हम ऊ के पासइ चली।

¹⁶तबइ थोमा जउन द्रिदुमुस कहिलावति रहइ अपन साथ के चेलन ते कहिस आवउ हमहूँ ऊ के साथइ मरइक चली।

यीसु मरे भये लाजर केर बहिनन केर धीरज देवत हइ

¹⁷यहिते यीसु केर गांव म आइके ई मालूम भवा कि ऊ का कबर म रक्खे चारि रोज हुइ गये हइ।

¹⁸बैतनियाह गांव यरुसलेम केर पासइ कउनउ दुइ मील की दूरी पइ रहइ।¹⁹अउर बहुतइ यहूदी मारथा अउर मरियम के पासइ उइके भाई के बारे म सान्ती देइक खातिर आए रहइ।²⁰यहिते मारथा यीसु के आवइ केर समाचार सुनिकइ ऊ ते भेंट करइ केर गई मरियम घरइ म बइठी रही।

²¹मारथा यीसु ते कहिसि हे परभु, अगर तुइ इहां होयतेव तउ हमार भाई कबहूँ नाई मरत।²²अउर अबहूँ हम जानित हइ कि जउन कछु तुइ परमेसुर ते मंगिहओ परमेसुर तुइका देहइ।

²³यीसु इते कहिन, तोहार भाई जी उठि हय।

²⁴मारथा ऊ ते कहिसि हम जानति हइ कि आखिरी दिन मां पुनरुत्थानइ के समय ऊ जी उठी।

²⁵यीसु ऊ ते कहिन, पुनरुत्थान अउर जीवनु हमहीं हन जउन कउनउ मोहिपइ बिसवासु करति हइ ऊ यदि मरिउ जाय, तबहूँ जी जइहइ।²⁶अउर जउन कउनउ जीवित हइ अउर मोहि पइ बिसवासु करी बहुत समय तलक न मरि हइ। का तू ई बात प बिसवासु करति हइ?

²⁷ऊ उइते कहिसि, हां हे परभु हम बिसवासु करि चुकेन हइ कि परमेसुर केर बेटवा मसीह जउन जगत म आवइ वाला रहइ, ऊ आपय हओ।

²⁸ई कहिकइ ऊ चली गइ अउर अपन बहिन मरियम केर चुपकेइ ते बुलाइ के कहिस—गुरु इहे हइ

अउर तुइका बुलावत हइ। ²⁹ई सुनितइ मरियम उठिकय ऊ केर पासइ आई। ³⁰यीसु अबहू गांव म नाई पहुँचा रहइ, पइ उहइ जगह न रहइ, जहाँ मारथा ते भेंट किहिस रहइ। ³¹तबइ जउन यहूदी उइके साथइ घर म रहइ ऊ का सान्ती देत रहइ, ई देखि कइ कि मरियम तुरतइ उठिकइ बाहर गई हइ अउर ई समझि के ऊ कबर प रोवइ क जाति हइ ऊ के पाछे हुइ लिहिन।

³²जइसइ मरियम उहाँ पहुँची जहाँ यीसु रहइ उइका देखतइ ऊ के पांउ प गिरि कइ कहिसि हे परभु यदि तुइ इहाँ होति तउ हमार भाई न मरत।

³³जबइ यीसु मरियम अउर यहूदियन क जउन ऊ के साथइ आये रहइ रोवत भये देखिन तउ आतमा म बहुतइ उदासु भव अउर घबराइ के कहिसि तुई ऊ का कहाँ धरि राखेव हइ? ³⁴उइ ऊते कहिन हे परभु चलिकइ देखिलेउ।

³⁵यीसु के आँसू बहइ लाग।

³⁶तब यहूदी कहइ लाग, देखउ ऊ वहिते कइस परेम राखति हइ।

³⁷पइ उनमा ते कितनेउ कहिन, का ई जउन अन्धरइ कि आंखिन क खोलिन इहउ नाई करि सका कि ई मनई न मरति?

लाजर केर जिलाइ जाव

³⁸यीसु मनमइहाँ फिरि बहुतइ उदासु हुइ कइ कबर प आवा, ऊ एकु गुफा रहइ अउर याक पाथर उइ पइ धरा रहइ। ³⁹यीसु कहिन, पाथर क उठाउ, उइ मरइ भए कि बहिन मारथा ऊ ते कहइ लागी, हे परभु उइमा ते अब बदनू आवति हइ, काहे ते उइका मरे चारि दिन हुइ गए।

⁴⁰यीसु ऊते कहिन केर हम तुइते नाई कहेन रहइ कि अगर तुइ बिसवासु करिहइ, तउ परमेशुर केर महिमा क देखिहव।

⁴¹तबइ उइ ऊ पाथर केर हटाइनि, तब यीसु आंखिन केर उठाइके कहिन हे बाप, हम तोहार धनवाडु करति हइ कि तुइ सबइ हमारि हइ। ⁴²अउर हम जानित रहइ कि तुइ सबइ हमारि सुनति हइ पर जउन भीर आसइ पास खड़ी हइ, ऊ केर कारन हम ई कहेन, जेहिते उइ बिसवासु करइ कि तू हमका भेजिसि हइ।

⁴³ई कहिकइ ऊ ऊंचेइ सबद ते पुकारिसि कि हे लाजर, निकरि आउ। ⁴⁴जउन मरि गवा रहइ, ऊ कफन ते हाथ—पांव बंधेइ भए निकरि आवा, अउर वहिका मुंह अंगउछे ते लिपटा भवा रहइ। यीसु उन्

ते कहिन, उइका खोलि के जान देउ।

यीसु केर मरवाइ डारेइ केर योजना

⁴⁵तब तउ यहूदी मरियम केर पासइ आए रहइ अउर उइका ई काम देखिन रहइ, उन्हमाते बहुतन ऊ पइ बिसवासु किहिन। ⁴⁶पइ उन्हमा ते कइयउ फरीसीसियन के पासइ जाइके यीसु के कामन क समाचारु दिहिन। ⁴⁷ई पइ महायाजकन अउर फरीसियन परधान सभइ के लोगन केर जोरि कइ कहिन, हम कहित का हइ? ई मनई तउ बहुतइ चीन्ह दिखावति हइ। ⁴⁸अगर हम ऊ का अइसइ छोरि देई तब सबइ उइ पइ बिसवासु लइ अइहइ अउर रोमी आइके हमारि जगह अउर जाति दूनउ प अधिकारु करि लइहई।

⁴⁹तबइ उइमा ते काइफा नाम का याक मनई जउनु उइ बरस केर महायाजक रहइ, उइते कहिसि, तुइ कछुइ नाई जानति। ⁵⁰अउर न ई सोचति हउ कि तोहरे खातिर ई भलइ हई कि हमार लोगन केर खातिर याक मनई मरइ, अउर न ई कि कुल के कुल जाति नास होई।

⁵¹ई बात क वहु अपन ओर ते नाई कहिसि, पइ उइ बरस केर महायाजक हुइ कइ आगे कि बात कहिसि, कि यीसु उइ जाति केर खातिर मरि हइ। ⁵²अउर न केवलु उई जाति के खातिर वरन ई खातिर ऊ की परमेशुर कि तितर—बितर फैली सन्तानन क याक करि देइ। ⁵³यहिते उइ दिन ते वइ ऊ का मारि डारइक राय करइ लाग।

⁵⁴इहिते यीसु उइ समय ते यहूदिन म परगट हुइ कइ नाई घूमा, पइ उहाँ ते जंगल के पासइ के देस म इफाइम नाम के याक नगरु क चलइ गवा। अउर अपन चेलन के साथइ उहँइ रहइ लाग।

⁵⁵अउर यहूदियन केर फसल पासइ रहइ, अउर बहुतइ लोग फसल केर पहिलेइ दिहात म यरुसलेम क गए, कि अपने आप केर सुद्ध करइ। ⁵⁶उइते वइ यीसु केर दूढ़इ अउर मंदिर म खरे हुइकइ आपसइ म कइह लाग, तुम का समझति हउ? ⁵⁷का ऊ परब मा न अइहइ? अउर महायाजकन अर फरीसियनिउ हुकुम देइ राखिन रहइ कि अगर कउनउ ई जानइ कि यीसु कहाँ हइ, तउ बतावे कि उइका पकरि लेई।

बैतनियाह गांव मां यीसु केर सुवागत

12 फिरि यीसु फसह केर छ दिन पहिलेइ बैतनिय्याह म आवा, जहाँ लाजर रहइ, जेहिका यीसु मरे हुअन म ते जिलाइसि रहइ। ²उहाँ

उइ ऊ केर खातिर भोजन तइय्यार किहिन अउर मारथा सेवा करति रहइ अउर लाजर उइ मा ते याक रहइ जन उइके साथइ भोजन करइ केर बैठे रहइ।³तबई मरियम जटामसीक आधा सेर बहु मोलक इतर लइ कइ यीसु केर पावन प डारिस अउर अपने बालन ते पाउ पोछिसि अउर इतर कि सुगंधी ते घर सुगन्धित हुइगा।

⁴यह वहि केर चेलन म ते यहूदा इस्करियोती नमक याकु चेला जउनु उइका पकरवाइय रहइ कहइ लाग।⁵ई इतर केर तीनि सउ दीनार म बेचि कइ कंगालन केर काहे न दिया गवा?⁶ऊ ई बात केर इह खातिर नाई कहिसि कि ऊ का कंगालन केर चिन्ता रहइ यह ई खतिर कि ऊ चोर रहइ अउर उइ केर पासइ उन्हे केर थैली रहति रहइ अउर मा जउन कछु डारा जाति रहइ, ऊ निकारि लेति रहइ।

⁷यीसु कहिनि उइका हमार गाइई जाइ केर दिन के खातिर रखि देउ।⁸काहे ते कंगाल तउ तोहार साथइ साथ रहति हइ। पर हम तोहार साथ हमेसा न रहिबे।

⁹यहुदियन म ते साधारन लोगन आइगे कि ऊ उहां हइ अर उइ न केवल यीसु केर कारन आए यह ई खातिर कि लाजर केर देखइ, जेहिका ऊ मरे हुअन म ते जिलाइ रहइ।¹⁰तबइ महायाजकन लाजरउ केर मारि डारइ क राय किहिन।¹¹काहे ते उइ केर कारन बहुतइ यहूदी चलेइ गए अउर यीसु पै बिसवासु किहिन।

यीसु केर यरुसलेम म परवेस

¹²दूसरे दिन बहुतइ लोगन जउन परबा म आएइ रहइ, ई सुनिकइ कि यीसु यरुसलेम म आवति हइ।¹³खजूर कि डारन क लइ अउर उइ ते भेंट करइक निकसे अउर पुकारइ लाग कि होसन्ना, धय हइ इसराएल केर राजा जउन परभु के नाम ते आवति हइ।

¹⁴जवइ यीसु केर याक गदहा के बच्चा मिला तउ उइ पर बइठा।¹⁵जइसउ लिखइ हइ, कि हे सिष्योन की बिटिया मत डरउ देखउ तोहार राजा गदहे केर बच्चे पे चढ़ा भवा चल आवति हइ।

¹⁶उइ के चेलन ई बातइ पहिले न समझे रहइ, पर जवइ यीसु कि महिमा परगट भइ तउ ऊ का यादि आई कि ई बातइ उइ के बारे म लिखि भइ हइ अउर लोगन ऊ तेई परकार क विउहार किहि रहइ।

¹⁷जबइ भीर केर लोगन, जउन ऊ समय ऊ केर साथइ रहइ ई गवाही दिहिन कि ऊ लाजर केर कबर म ते बुलाइके, मरे हुअन म ते जिलाइसि हय।

¹⁸इहइ कारन लोग ऊ ते भेंट करइक आए रहइ, काहे ते उइ सुनिन रहइ कि वहिने ई अचरज केर काम दिखाइसि हइ।¹⁹तबइ फरीसियन आपसइ म कहिनि, सोच तउ सही कि तुम ते कछु नाइ बनि सकति, देखउ संसारु ऊ केर पाछे हुइ चला हइ।

यीसु अपन मिरतु केर बारे मा भविसवानी करत हये

²⁰जउन लोग ऊ परब मा भजन करइक आए रहइ उइ मा ते कइयउ यूनानी रहइ।²¹उइ गलील केर बैतमैदा केर रहइ वाले फिलिप्युस केर पासइ आई के ऊ ते विनती किहिन, कि श्रीमान, हम यीसु ते भेंट करइक चाहित हइ।²²फिलिप्युस आई कइ अन्द्रियास ते कहिनि, तबइ अन्द्रियास अउर फिलिप्युस यीसु ते कहिनि।

²³ई पर यीसु उइते कहिनि ऊ समय आई गवा इ कि मनई केर बेटवा कि महिमा होय।²⁴हम तुहित साचई—सच कहिति हइ जबइ तलक गेहूँ केर दाना जमीन म परिकइ मरि नाइ जाति ऊ अकेलइ रहति हइ। पर जवइ ऊ मरि जात हइ तउ ढेर सारे फल लावति हइ।²⁵जउन आपन परान केर पियार जानति हइ ऊ उइका खोइ देति हइ अउर जउन ई जगत म अपन परान केर परेम हीन जानति हइ ऊ हमेसा केर जीवन केर खातिर ऊ कि हिफाजत करि हइ।²⁶अगर कउनउ हमार सेवा करइ, तउ हमरे पीछे हुइ लेइ, अउर जहां हम जाइ ऊ हमार सेवकउ हुइहइ, अगर कउनउ हमारि सेवा करइ, तउ बापु उइका आदरु करिहइ।

²⁷अब हमार जिउ घबराइ रहा हइ ई खातिर अब हम का कही? हे बापु मोहिका ई घरी ते बचाउ? पर हम इहइ कारन ई घरी केर पहुँचैन हइ।

²⁸हे बापु अपन बाप की महिमा करउ: तबइ ई आकासवानी भई, कि हम उइकी महिमा किहेन हइ अउर फिरउ करिब।²⁹तब जउन लोग खड़े भये सुनि रहे रहइ, उई कहिन कि बादरु गरजा हइ, अउर कहिनि कउनउ सरग दूत उइ ते बोला हइ।

³⁰ई पर यीसु कहिन ई सबद हमरे खातिर नाइ पर तोहरे खातिर आवा हइ।³¹अबइ ई जगत केर नियाव होति हइ अबइ ई जगत क सरदार निकारि दिया जाई।³²अउर हम अगर जमीन पर ते ऊंचे चढ़ाए जइबेइ तउ सबइक अपन पासइ खिचिहउ।³³अइस कहिकइ ऊ ई परगट करि दिहिस कि ऊ कइसन मउत ते मरिहइ।

³⁴ई पर लोगन ऊ ते कहिनि, कि हम बेवस्था कि ई बात क सुने हइ कि मसीह हमेसा रहिहइ फिर तू

काहे कहति हइ कि मनई के बेटवा केर ऊंचे पर चढ़ावा जाइ केर जरूरी हइ?

³⁵ई मनई केर बेटवा कउन हइ? यीसु वहिते कहिन, जोति अबइ थोरिय देर तलक तोहरे बीच म हइ। जबइ तलक जोति तोहरे साथइ हइ तबइ तलक चलेइ चलेउ, अइस न होइ कि अंधेर तुमका आइ घेरइ, जउन अंधकार म चलति हइ ऊ नाइ जानति कि किधर जाति हइ। ³⁶जबइ तलक जोति कि सन्तान हउ। इन बातन क कहि कइ यीसु चला गवा अउर वहिते छिपइ रहा।

यहूदियन केर अविस्वासु

³⁷अउर ऊ उन्हे के समूहइ चीन्ह दिखाइसि तबहू उइ उन्हे पर बिसवासु नाइ किहिन। ³⁸जेहिते यसायाह नबी केर बचन पर होय, जउन ऊ कहिसि कि हे परभु हमार समाचार केर कउनउ परतीति (बिसवासु) किहिसि हइ? अउर परभु केर भुजबल केहि पइ परगट भवा? ³⁹ई कारन उइ बिसवासु नाई कर सके, काहे ते यसायाह फिरउ कहिसि।

⁴⁰कि ऊ उइकी आखिन क अंधरी अउर उइका मन कठोर किहिसि हइ कहूँ अइसन न होय कि वह आखिन ते देखइ अउर मनई ते समुझइ अउर फिर हम उन्हेका चंगा करी। ⁴¹यसायाह ई बातन केर ई खातिर कहिन कि ऊ उइकी महिमा केर देखिन।

⁴²तऊ सरदारन म तेउ बहुतन ऊ पइ बिसवास किहिन। पर फरीसियन केर कारन परगट म नाइ मानत रहइ। अइस न होय कि आराधनालय म ते निकाति जाई। ⁴³काहे ते मनईन केर परसंसा उन्हे का परमेसुर की परसंसा ते अधिक नीक लागत रहइ।

⁴⁴यीसु पुकारि कइ कहिन, उन जउन मनई हमरे प बिसवासु करत हइ ऊ हमरे प नाइ बल्कि हमरे भेजइ वाले प बिसवासु करत हई। ⁴⁵अउर जउन हमका देखति हइ ऊ हमार भेजइ वाले केर देखति हइ। ⁴⁶हम जगत म जोति होइ कइ अपन हइ हन जेहिते जउनउ कउनउ हमरे प बिसवासु करी ऊ अन्धेरे म न रही।

⁴⁷अगर कउनउ हमारि बातन केर सुनि कइ न मानइ तउ हम उका दोसी नाइ ठहराइति काहे ते कि हम जगत का दोसी नाइ ठहराइति पर संसार केर उद्धार करइ केर खातिर आए हन। ⁴⁸जउन हमका तुच्छ जानत हई अउर हमारि बातन क अपनावत नाइ हइ उइका दोसी ठहरावइ वाला याकइ हइ यानी जउन वचन कहेन हइ, वह पिछले दिनन मां ऊ दोसी ठहरइहइ। ⁴⁹काहे ते हम अपन ओर ते बातइ

नाई कहेन पइ बापु जउन हमका भेजिसि हइ उइ मोहिका आग्या दिहिसि हइ कि का का कही? अउर का का बोली? ⁵⁰अउर हम जानित हइ कि उइ कि आग्या हमेसा का जिन्दा रहइ। ई खातिर हम जउन बोलिति हइ ऊ जइसन बापु मोहिते कहिन हइ वइसनइ बोलिति हइ।

यीसु अपन चेलन केर गोड़ धोवत हइ

13 फसह केर परब ते पहिले जबइ यीसु जानि लिहिन कि हमार ऊ घरी आइ पहुँची हइ कि जगत छोरि कइ बापु केर पासइ जाइ, तउ अपन लोगन ते जउन जगत म रहइ, जइस परेम ऊ राखत रहइ, अन्त तलक वइसइ परेम राखत रहा।

²अउर जबइ सइतान समौन केर पुत्र यहुदा इस्करियोती के मन मा ई डारि चुका रहइ कि ऊ का पकरिवावइ, तउ भोजन केर समय। ³यीसु ई जानि कइ कि बापु सबइ कछु हमरे हाथ म करि दिहिन हइ अउर हम परमेसुर के पासइ ते आयेन हइ, अउर परमेसुर के पासइ जाइति हइ। ⁴भोजनु पइते उठि कइ अपन कपड़न केर उतारि दिहिन अउर अंगउछा लइकइ अपन कमर क बांधिन ⁵तबइ बासन म पानी भरि कइ चेलन केर गोड़ धोवइ क अउर जेहि अंगउछा ते ऊ की मकर बांधि रहइ वहिते पोंछइ लाग।

⁶जबइ समौन पतरस के पासइ आवा, तबइ ऊ उइते कहिसि हे परभु।

⁷का तू हमार पावन केर धोवति हइ? यीसु जबाबु दिहिन कि जउन हम करति हइ, तुइ अब नाई जानति, पइ इहके बादि समझि हइ।

⁸पतरस ऊते कहिसि, तू हमार पावन केर कबहूँ धोवइ क न पइहो ई सुनिकइ यीसु ऊ ते कहिन अगर हम तुइका न धोई तउ हमरे साथइ तोहार कुछ उ साझा नाई।

⁹समौन पतरस ऊते कहिसि, हे परभु तउ हमार पावनइ क नाई बल्कि हाथ अउर सिरउ क धोई देउ।

¹⁰यीसु ऊते कहिन, जउन नहाइ चुकइ हइ, ऊका पाउ के अलावा अउर कुछउ धोवइक परयोजन नाइ, पइ ऊ पूरी तरह सुद्ध हइ। अउर तुइ सुद्ध हइ पइ सबइ के सब नाई। ¹¹ऊ तउ अपन क पकरवावइ वाले केर जानति रहइ ई खातिर ऊ कहिसि तुम सबहि के सब सुद्ध नाई।

¹²जबइ ऊ उन्हेके पावन क धोइ चुका अउर अपन कपरन केर पहिनि कइ बैठि गवा तउ उइसे कहइ लाग का तुम समझेउ कि हम तोहरे साथ का किएन? ¹³तुइ मोहिका गुरु अउर परभु कहति हउ अउर ठीकइ

कहति हउ, काहे ते हम वहइ हइ।¹⁴अगर हम परभु अउर गुरु होइके तोहार पावन का धोएन तउ तुमहुक याक दुसरे के पावन धोवइ के चाहि।¹⁵काहे ते हम तुइका नमूना दिखाइ दिहेन हइ कि जइसन हम तोहरे साथइ किएन हइ तुमहू वइसनइ किया करउ।¹⁶हम तुइते सचइ सच कहिति हइ, दासु अपन मालिक ते बड़ा नाई अउर जे भेजा भवा, अपन भेजइ वाले ते।¹⁷तुम तउ ई बातन क जानत हउ अउर अगर उइ पइ चलउ तउ धन्यइ हउ।

यीसु केर बिसवासुघात केर भविसवानी

¹⁸हम तुइ सबन के बारे म नई कहित, जेहिका हम चुनि लिएन हइ, उन्हे का हम जानति हइ। पइ ई खातिर हइ कि पवितर सास्तर केर ई बचनु पूर होई कि जउनु हमार रोटी खात हइ, ऊ मोहि पइ लात उठाई।

¹⁹अबइ हम ऊ केर आइ केर पहिले तुम्हका जताए देइत हइ कि जबइ उइ जाइ तउ तुम बिसवासु करेउ कि मै वहइ हन।²⁰हम तुमते सचइ—सच कहित हइ कि जउन हमार भेजइ भये केर स्वीकार करत हइ, ऊ हमहुम स्वीकार करत हइ अउर जउन हमका स्वीकार करत हइ, ऊ हमार भेजइ वालेउ केर स्वीकार करत हइ।

²¹ई बातन केर कहिके यीसु आतमा म घबराइ गवा अउर ई गवाही दिहिस कि हम तुइते सांचइ—सांच कहित हन, केर तुइ मा ते याकु हमका पकरिवइ हइ।

²²चेलन ई सन्देहु करित भए कि ऊ केहिके बारे म कहत हइ याक दुसरई की ओर देखन लाग।²³उइके चेलन मते याकु जेहिते यीसु परेम करति रहइ यीसु की छाती की ओर झुका भवा बइठा रहइ।²⁴तबइ समौन पतरस ऊ की ओर इसारा करि कइ पूछिस कि बताउ, तउ ऊ केहिके बारे म कहत हइ?

²⁵तबइ ऊ उइ तरह यीसु की छाती की ओर झुकि कइ पूछिस हे परभु ऊ कउन हइ? यीसु जबाबु दिहिन जेहिका ई रोटी का टुकरा डुबाइ केर देइब, उहइ हइ।

²⁶अउर ऊ टुकरा केर डुबाइ केर कइ समौन के बेटवा यहूदा इस्करियोती केर दिहिस।²⁷अउर टुकरइ लेतइ सैतान उनमा समाइ गवा, तबइ यीसु उइते कहिन, जउन तुइ करत हइ, तुरतइ करउ।²⁸पर बैठइ वालेन म ते कउनउ नाहि जानिस कि ऊ ई बात ऊते केहि खातिर कहिस।²⁹यहूदा केर पासइ थैली रहत

रहइ, ई खातिर कउनउ कउनउ समझिस कि यीसु उइते कहत हइ कि जउन कुल हमका परब के खातिर चहिइय उइका मोल लेइ या ई कि कंगलन केर कछु देई।³⁰तबइ ऊ टुकरा लइकइ तुरतइ बाहर चला गवा अउर ऊ राति क समउ रहइ। पतरस यीसु केर इनकार करी।

नवा आग्या

³¹जब यहूदा बाहर चला गवा तब यीसु कहिन, अब मनई केर बेटवा के महिमवा भइ, अउर परमेसुर की महिमा ऊमा भई।³²अउर परमेसुर अपन म ऊकी महिमा करि हइ।

³³हे बच्चों, हम अउर थोरी देर तलक तोहरे पासइ हन, फिरि बाद का तुम हमका ढुंढिहइ अउर जइस हम यहूदियन ते कहा वइसइ अब हम तुम तेउ कहति हइ।

³⁴हम तुमका याक नई आग्या देइति हइ, कि याक दुसरे ते परेम राखउ जइस हम तुहिते परेम राखेन हइ वइसइ तुमहू याक दुसरे ते परेम राखउ।³⁵अगर आपस म परेम राखिहउ इहइते सब जनहइ कि तुम हमार चेला हउ।

³⁶समौन पतरस ऊते कहिस, हे परभु तुम कहां जात हइ? यीसु जबाबु दिहिन कि जहां हम जाइति हइ, उहां तू अब हमरे पीछे आइ नाइ सकत पइ ई के बादइ हमार पीछे ते अइहइ।

³⁷पतरस ऊ ते कहिस, हे परभु अबहिन हम तोहार पाछे काहे नाई आइ सकित? हम तउ तोहरे खातिर परान देइब।

³⁸यीसु जबाबु दिहिन, का तुइ हमार खातिर अपन परान देइहओ? हम तोहि ते सांचइ—सांच कहित हइ कि मुरगा बांग न देइ जबइ तलक तुई तीन बेर हमार इन्कार नाई कर लेइहइ।

यीसु अपन चेलन कइहन सान्ती देवत हइ

14 तोहार मन बियाकुल न होय तुम परमेसुर प बिसवासु राखति हउ, हमहू परउ बिसवासु राखउ।²हमार बापु के घर मां बहुतेरे रहइ केर स्थान हइ, अगर नाइ ऊ होते, तउ हम तुम ते कह देइति, काहे ते हम तोहरे खातिर जगह तैयार करइ केर जाइत हइ।³अगर हम जाइके तोहरे खातिर जगह करिब तउ फिरि पाछेते आइकेइ तोहिका अपनेइ इहां लइ जाइब, कि जहां हम रहिब उहइं तुमहू रहउ।⁴अउर जइहां हम जाइति हइ तुमहू उहइ क मारग जानति हउ।

यीसु परमेश्वर केर मारग हवै

⁵थोमा ऊते कहिसि, हे परभु हम नाई जानिति कि तू कहाँ जाति हइ? तउ मारग कइसेइ जानी?

⁶यीसु ऊते कहिन, मारग अउर सच्चाई अउर जीवनु हमहीं हन, बिन हमरे जरिए कउनउ बाप केर पासइ नाई पहुँचि सकत। ⁷अगर तुम हमका जानइ चाहत हउ, तउ हमार बापु का जानत अउर अब ऊका जानत हउ अउर ऊका देखउ हइ।

⁸फिलिपुस ऊ ते कहिस, हे परभु बाप केर हमका दिखइ देउ इहइ हमार खातिर बहुत हइ।

⁹यीसु उइते कहिन, हे फिलिपुस, हम इतने दिनन ते तोहरे साथ हन अउर का तुइ हमका नाई जानत? जउन हमका देखिस हइ, ऊ बापु देखिस हइ, तू काहे कहत हइ कि बापु क हमका दिखाउ। ¹⁰का तू परतीति नाइ करत, कि हम बाप म ते हन, ई बातन क जउन हम तुमते कहत हइ, अपनेइ ओर ते नाई कहत, पइ बाप मोहिम रहिकइ अपन कामु करति हइ। ¹¹हमारिउ बिसवासु करउ, कि हम बाप म ते हन, अउर बाप मोहिमा हइ, नाई तउ का मनई केर कारन हमारि बिसवासु करउ। ¹²हम तुमते सचइ कहति हउ कि जउन मोह पइ बिसवासु राखति हइ, ई काम जउन हम करति हइ उहउ करिहउ बल्कि इनहुन ते बडेइ काम करिहइ, काहे ते हम बाप के पासइ जाइति हइ। ¹³अउर जउन कछु तुम हमार नाम ते माँगिहउ, उहइ हम करिवइ कि बेटवा के जरिए बाप कि महिमा होई। ¹⁴अगर तुम मोहिते हमरे नात ते कछु माँगिहउ तउ हम उ करिब।

एकु सहायकु देहहय पवित्र आतमा

¹⁵अगर तुम हमते परेम राखति हउ तउ हमारि आग्यन क मानिहउ। ¹⁶अउर हम बापु ते विनती करब अउर ऊ तुमका याकु अउर सहायकु देइहइ, कि ऊ सदइ तोहरे साथइ रहइ। ¹⁷यानी सच केर आतमा जिहिका संसारु स्वीकार नाई कर सकत, काहे, ते ऊ न उइका देखति हइ अउर न उइका जानति हइ, तुम तउ ऊका जानत हउ, काहे ते ऊ तोहार साथइ रहत हइ, अउर ऊ तुममा होई। ¹⁸हम तोहिका अनाथ न छोड़िबे हम तोहरे पास आइति हइ। ¹⁹अउर थोरिय देर रहि गइ हइ कि फिरि संसारु हमका न देखिहइ पर ऊ तू मोहिका देखिहइ, ई खातिर कि हम जीवित हन तुमहू जीवित रहिहउ। ²⁰उइ दिन तुम जनिहउ कि हम अपन बाप म हन, अउर तुम मोहिमा अउर हम तुम मा हन। ²¹जेहिके पासइ हमार हुकुम हइ अउर ऊ उइका मानति हइ, उहइ हमते परेम राखति हइ

अउर जउन मोहिते परेम राखति हइ, ऊ ते हमार बापु परेम राखिहइ अउर हम ऊ ते परेम राखिब अउर अपन आप केर उइ पइ परगट करिब।

²²ऊ यहूदा जउन इस्कारियोति नाई रहइ, ऊ ते कहिसि, हे परभु का भवा कि तू अपन आप केर हम पइ परगट कीन चाहति हउ संसारु पइ नाई।

²³यीसु ऊ का जबाबु दिहिन, अगर कउनउ मोहिते परेम राखइ तउ ऊ हमार बचन केर मनिहइ, अउर हमार बाप उइते परेम राखिहइ, अउर हम उइके पासइ आइब अउर ऊ केर साथइ बास करिब। ²⁴जउन हमते परेम नाई राखत, ऊ हमरे बचनु नाई मानत, अउर जउन बचनु तुम सुनत हउ, ऊ हमार नाई, बल्कि बाप केर हइ, जउन मोहिका भेजिस।

²⁵ई बातन क हम तोहरे साथइ रहत भए तुमते कहिन। ²⁶पइ सहायक यानी पवित्र आतमा जेहिका बाप हमार नाम ते भेजिहइ ऊ तुमका सबइ बातइ सिखाई अउर जउन कछु हम तुमते कहिन हइ ऊ सबइ तुम का याद कय रहइ। ²⁷हम तुहिका सान्ती दिए जाइति हइ, अपन सान्ती तुमका देइति, तोहार मन न घबराई अउर न डेराई।

²⁸तुम सुनेउ कि हम तुइते कहेन जाइति हइ अउर तोहरे पासइ फिरि आइति हइ, अउर तुम हमते परेम राखति हउ तउ ई बात ते खुस होव कि हम बाप के पास जाइत हइ। काहे ते बाप मोहिते बड़ा हइ। ²⁹अउर हम अब ई के होइके पहिलेइ तुमते कहि दिहिन हइ कि जवइ ऊ हुइ जाय तबइ तुम बिसवासु करउ। ³⁰मैं अबते तोहारइ साथ अउर बहुतइ नाइ करब काहे ते ई संसारु केर सरदार आवत हइ अउर हम ते उइक कुछु नाई ³¹पइ ई खातिर होति हइ कि संसारु जानइ कि हम बाप ते परेम राखत हइ अउर जइसइ बाप हमका हुकुम दिहिन, हम वइसेइ करित हइ, उठउ, इहां ते चली।

दाखलता अउर डारियां

15यीसु कहिन सच्चिइय दाखलता हम हन, अउर हमार बापु किसानु हइ। ²जउन डारि हममा हइ अउर नाई फलत ऊ काटि डारति हइ, अउर जउन फलत हइ ऊका छांटीति हइ, जेहिते ऊ अउर फलइ। ³तुइ तइ उइ बचन केर कारन जउन हम तोहिते कहिन हइ सुध होइ। ⁴तुइ मोहिमा बनेइ रहेउ अउर हम तोहिमा। जइइस डारि अगर दाखलता म बनी न रहइ, तउ अपने आपइ नाई फलि सकत वइसइ तुमहू अगर हम मां बनेइ न रह तउ उइ नाई फलि सकत हउ।

⁵हम दाख लता हन, तुम डालि हउ, जउन मोहिमा बना रहत हइ अउर हम उइमा ऊ बहुतइ फल फलत हइ, काहे ते मोहि ते अलग होइ कइ तुम कुछउ नाई करि सकत। ⁶अगर कउनउ मोहिमा बनइ रहइ तउ ऊ डारि की नाई फेंकि दीन जाति अउर सूख जाति हइ, अउर मनई बटोरि कइ आगी मं झोकि देति हइ अउर उइ जलि जात हइ। ⁷अगर तुम हममा बनेइ रहउ अउर हमारि बातइ तुममा बनी रहइ तउ जउन चाहउ मांगउ ऊ तोहरे खातिर हुइ जाई। ⁸हमार बापु की महिमा यहिते होति हइ कि तुम बहुतइ फल लाउ, तबइ तुम हमार चेला ठहरिहउ।

⁹जइस बाप मोहिते परेम राखिन, वइसइ हम तोहिते परेम राखेन, हमरे परेम म बनेइ रहउ। ¹⁰अगर तुम हमार आग्या केर मनिहउ, तउ हमरे परेम बनेइ रहिहउ जइस कि हम अपन बाप कि आग्या क मानेव हइ, अउर ऊ के परेम म बनइ रहत हउ। ¹¹हम ई बातन केर तोहिते ई खातिर कहेन कि हमार आनन्द तुम मा बनइ रहइ अउर तोहार आनन्द पूर होइ जायै। ¹²हमार आग्या ई हइ कि जइस हम तुमते परेम राखेन वइसइ तुमहू याक दुसरे ते परेम राखउ। ¹³ई ते बड़इ परेम केहुक नाई, कि कउनउ अपन मितर के खातिर अपन परान देइ। ¹⁴जउन कछु हम तोहिका आग्या देइत हइ, अगर ऊ करउ तौ तुम हमार मितर हउ। ¹⁵अबहिन ते हम तोहिका दास न कहब काहे ते दास नाई जानति कि ओकर स्वामी का करत हइ, पर हम तोहिका साथी कहेन हई, काहे ते हम जउन बातइ अपन बाप ते सुनी हइ उइ सबइ तुमका बताइ दिहेन। ¹⁶तुइ हमका नाई चुनेव पइ हम तोहिका चुनेन हइ, अउर तोहिका ठहरावा हइ, जोहि ते तुम जाइ करे फल लाउ अउर तोहार फल बनइ रहइ, कि तुम हमरे नाम ते जउन कछु बाप ते मांगउ ऊ तुमका देइ। ¹⁷ई बातन केर आग्या हम तुमका ई खातिर देइत हइ कि तुम याक दुसरे ते परेम राखउ।

संसार चेलन ते बैरु

¹⁸अगर संसार तुम ते बैरु राखत हइ, तउ तुम जानत हइ कि ऊ तुमते पहिलेइ मोहि तउ बैरु राखिस। ¹⁹अगर तुम संसार के होतेउ, तउ संसार अपनन ते परेम राखति, पइ ई कारन कि तुम संसार के नाई हउ, वहिक हमका तुमका संसार म ते चुन लिहेन हइ ई खातिर संसार तुमते बैरु राखति हइ। ²⁰जउन बात हम तुमते कहिन रहइ, कि दास अपन स्वामी ते बड़इ नाई होति, उइका यादि राखेउ, अगर उइ हमका सताइन, तउ तुमहुम सतइहइ, अगर उइ

हमार आग्या कबहुं मानिन तउ तुमहरिउ मानि हई। ²¹पइ ई सबइ कछु उइ हमरे नाम के कारन तोहरे साथउ करि हइ, काहे ते वइ हमार भेजइ वाले केर नाई जानति। ²²अगर हम न आइति अउर उइते बातइ न करित, तउ उइ पापी न ठहरते पइ अब उइके उइके पाप के खातिर कउनउ बहाना नाई। ²³जउन हमते बैरु राखत हइ, ऊ हमार बापउ ते बैरु राखति हइ। ²⁴अगर हम उनहुन म उइ काम न करति जउन अउर कउनउ नाई किएस तउ वइ पापी नाई ठहरते, पइ ब तउ उनहुन मोहि का अउर हमार बाप दुनउ क देखिनि अउर दुनउ ते बैरु किहिन। ²⁵अउर ई खातिर भवा कि ऊ वचनु पूर होई जउन उनकेर धरम बेवस्था म लिखा हइ कि उनहुन मोहिते बेकार म बैरु किहिन। ²⁶पइ जबइ सहायकु अइहइ, जेहिका हम तोहरे पासइ बाप केर ओर ते भेजिबइ, यानी सच कि आतमा जउन बाप की ओर ते निकसत हइ, तउ हमारि गवाही देइ हइ। ²⁷अउर तुमहू गवाह हउ, काहे ते तुम सुरुइ ते हमरे साथइ रहेइ हउ।

16 ई बातन क हम तुइते ई खातिर कहेन कि तुइ ठोकरु न खाऊ। ²वइ तुम का आराधनालय मते निकर देहइ, बल्कि ऊ समयु आवत हइ कि जउन कउनउ तुइका मारि डलिहै ऊ समझी कि हम परमेसुर की सेवा करित हइ। ³अउर ई वहइ खातिर करिहई कि उनहुन न बाप केर जानित हइ अउर न हमका जानत हइ। ⁴पै ई बातन केर हम तुइते ई खातिर कहिन कि जबई उइका समयु आई तउ तोहार याद आई जाई कि हम तुमते पहले कइ दीन रहइ अउर सुरु म हम तुइते ई बातन केर ई खातिर नाई कहिन काहे ते हम तुमरइ साथइ रहेन।

पवित्र आतमा केर कमवा

⁵अब हम आपन केर भेजइ वालेइ के पासइ जाइति हइ, अउर तुम मते कउनउ नाई हमते पूछत कि तुम कइं जात हऊ। ⁶पर हम जउनि ई बातन क तुमते कहिन हइ ई खातिर तोहार मन सोक ते भरि गवा हई। ⁷तउ हम तुइते सचइ कहित हइ, कि हमार जाइक तोहरे खातिर नीकइ हइ, काहे ते अगर हम न जाई, तउ ऊ सहायक तोहरे पासइ न आई। पर अगर हम जाइव तउ ऊका तोहरे पासइ भेजि देइब। ⁸अउर ऊ आइकइ संसार केर पापु अउर धारमिकता अउर नियाउ के बारे म निरुत्तर करि देइ। ⁹पाप के बारे में ई खातिर कि वइ मोहि पर बिसवासु नाई करी। ¹⁰अउर धारमिकता केर बारे म ई खातिर कि हम बापु

के पासे जाइति हइ। ¹¹अउर तुम हमका फिरि नाई देखिह, नियाउ के बारे म ई खातिर कि संसार के सरदार दोसी ठहरावा गवा हइ।

¹²हमका तोहिते अउर उइ बहुतइ बातन क कहइक हई, पर अबही तुम उइका सहि नाई सकति हऊ। ¹³पर जबइ ऊ यानी सच के आतमा अइहइ तउ तोहिका सबइ सच का मारग बतइहइ। काहे ते ऊ अपन ओर ते न कहिहइ। मुला जउन कछु सुनिहइ उहइ कहि हई। अउर आवइ वाली बातन केर तोहिका बतइहई। ¹⁴ऊ हमार महिमा करि हई काहे ते ऊ हमार बातन मते लइ कइ तुहिका बतइहइ। ¹⁵जउनउ कछु बापु कहई ऊ सबइ हमार हई। ई खातिर हम कहेन कि ऊ हमार बतिया मा ते लइकइ तोहिका बतइहइ।

चेलन केर सोक आनन्दु बनी

¹⁶कछु देर म तुइ हमका नाई देखिहउ। अउर फिरि थोरिय देर मा हमका देखिहउ।

¹⁷तबइ ऊके कितनेइ चेला आपसइ म कहिन ई का हई जउन उइ हमते कहत हई कि थोरिय देर म तुम हमका नाई देखिहउ? अउर फिर थोरी देर मा मोहिका देखिहउ? अउर इव ई खातिर कि हम बापु के पासइ जाइत हइ।? ¹⁸तबइ उइ कहिन ई थोरिय देर जउन ऊ कहति हइ का बात हइ? हम नाई जानिति, कि का कहत हई।

¹⁹यीसु ई जानिकइ कि वह हमते पूछब चाहति हइ। उइते कहेन का तुम आपास म हमार ई बातन केर पूछताछ करत हउ? कि थोरिय देर म तुम हमका नाई देखिहउ। अउर फिरि तुम थोरिय देर म मोहिका देखिहउ। ²⁰हम तुमते सचइ—सच कहित हइ कि तुम रोइहउ अउर विलाप कहिउ, यहि संसार आनन्दु करि हइ, तुमका सोक होइहइ पर तोहार सोक आनन्दु बनि जइहइ। ²¹जबइ अउरत बच्चे केर जनइ लागत हइ तउ ईका सोक होति हइ काहे ते उइकी दुखइ की घरी आइ पहुंचति पर जबइ ऊ बालक जनि चुकि हइ तबइ ई आनन्दु ते कि जगत म एक मनई जनमा हइ। ऊ संकट केर फिरि यादि नाई करति हइ। ²²अउर तुमहूँ केर अबतउ सोक हइ, पर हम तुमते फिरि मिलिबइ अउर तोहरे मन म आनन्दु होई अउर तोहार आनन्द कउनउ तुहिते छीनि न लेइहइ। ²³ऊ दिन तुम मोहिते कछु न पुछिहैव हम तोहिते सचइ सच कहित हई। अगर बाप ते कछु मंगिहउ तउ ऊ हमार नाम ते तुइका देइ हई। ²⁴अबइ तलक तुइ हमारि नाम ते कछुउ नाई मागेउ। मंगिहउ तउ पइहउ जेहिते तुम्हार

आनन्दु पूर होइ जाई।

²⁵हम ई बातन क तुइते उदाहरनन म कहेइ हई, पर ऊ समय आवत हई, कि हम तुइते उदाहरननु म नाई कहिबइ, पर खोलि कइ तुमका बापु केर बारे म बताइब। ²⁶ऊ दिन तुइ हमार नाम ते मंगिहउ, अउर हम तुइते ई नाई कहिस कि हम तोहरे खातिर बापु ते विनती करब। ²⁷काहे ते बाप तउ आपइ तुइते परेम राखत हई, ई खातिर कि तुइ मोहिते परेम राखत हइ। अउर इहइ परतीत कीन हइ कि हम बाप की ओर ते निकर आएन। ²⁸हम बाप ते निकर कइ जगत म आएन हइ फिरि जगत क छोरि कइ बाप के पासइ जाइत हइ।

²⁹ऊ के चेलन कहिन, देखउ, अब तउ तुइ खोलि कइ कहत हइ, अउर कउनउ उदाहरनु नाई कहत। ³⁰अब हम जनि गएन कि तुइ सबइ कछु जानित हइ, अउर उइका परयेजन नाई, कि कउनउ तुइते पूछइ, ई ते हर परतीति करित हई कि तुइ परमेसुर ते निकरि आवु।

³¹ई सुनि कइ यीसु उइते कहिन, का तुम अब परतीति करत हऊ? ³²देखउ ऊ घरी आवति हइ, बल्कि आइ पहुंची हइ कि तुम सब तितर—बितर हइके अपन—अपन मारग लइहउ अउर मोहिका अकेलेइ छोरि देहउ तउ हम अकेल नाई काहे ते बाप हमरेइ साथेइ हइ।

³³हम ई बातन क तुइते ई खातिर कहिन हइ कि तोहिका मोहिका सान्ति मिले, संसार म तुइका कलेसु होति हइ अइस ढांढस बांधउ, हम संसार का जीति लिहिन हइ।

अपन खातिर यीसु केर पराथना

17यीसु ई बातइ कहिन अउर अपन आंखिन क आकास केर ओरइ उठाइ कइहन हे बापु ऊ घरी आइ पहुंची हइ, अपन बेटवा केर महिमा करउ कि बेटवा तोहार महिमा करइ। ²काहे ते तू उइका सबइ परानिन यइपर अधिकार दिहेउ कि जिन्ह का तूइ ऊ का दिहिसि हइ, उइ सबन केर ऊ अपारु जीवनु देइ। ³अउर अनन्त जीवनु ई हइ, कि उइ तुह अद्धेत सच्चेइ परमेसुर क अउर यीसु मसीह केर जेहिका तुइ भेजिस हइ, जानइ। ⁴जउनु कामु तुइ मोहिका करइ केर दिहिस रहइ, ऊ का पूरा करि कइ हम धरती प तोरि महिमा किएन हइ। ⁵अउर अबइ हे बापु तू अपन साथइ हमारि महिमउ ऊ महिमा ते करइ जउन जगत के होइते पहिलेइ हमारि तोहरे साथइ रहइ।

अपन चेलन खातिर यीसु के पराथना

⁶हम तोहार नाम उइ मनईन पर परगट किएन जउनु तुइ जगत म ते मोहि दिहस वइ तेरेइ रहइ अउर तुइ जगत म ते मोहिका दिहिस अउर जउनु तोहरे वचन क मानि लीन हइ। ⁷अब वइ जानि गएन हइ कि जउनु कुछ तुइ मोहिका दिहिस हइ, सबइ तोहरेइ ओर ते हइ। ⁸काहे ते जउनु बातइ तुइ मोहिका पहुंचाइ दिहिस हम उनहुन क उइका पहुंचाइ दिहेन अउर उनहुन उइका गरहन किहिन अउर सचइ सच जानि लिहिन हइ कि हम तोहर ओर ते निकलेन हइ अउर परतीति करि लिहेन हइ कि तुहिइ मोहिका भेजिसि। ⁹हम उइ केर खातिर विनती करत हन संसार के खातिर विनती नाइ करित हइ पर उनहिन के खातिर जिनहिन क तुइ मोहिका दिहिस हइ काहे वह तेरेइ हइ। ¹⁰अउर जउनु कुछु हमार हइ ऊ सबइ तोहार हइ अउर जउनु तोहार हइ ऊ हमार हइ अउर इनहिन ते हमार महिमा परगट भई हइ। ¹¹हम आवइ वाले जगत म नाइ रहिबइ, पर ई जगत म रहिहइ अउर हम तोहरे पासइ आइति हइ। हे पवित्र बाप अपन उइ नाम ते जउनु तू मोहिका दिहिस हइ उइ की रच्छा करउ कि हमरेइ नाइ एकु होइ। ¹²जबइ ते हम उइके साथई रहेन तउ हम तोहरे उइ नाम ते जउनु तुइ हमका दिहिस रहइ उइकी रच्छा करउ, हम उइ की चौकसी किहेन अउर विनास होइ वाले पुत्र केर खोरि उइ मा ते कउनउ नास न भवा, इ खातिर कि पवित्र साख कि बात पूरी होय।

¹³पर जबइ हम तोहरे पासइ आइत इह अउर ई बातन केर जगत मे कहित हइ कि उइ हमार आनन्दु अपन म पूरइ पावइ। ¹⁴हम तोहर वचन इका पहुंचाई दिएन हइ, अउर संसार उइते बैरु किहिस, काहे ते जइस हम संसार केर नाइ वइसेइ उहउ संसार केर नाई। ¹⁵हमई विनती नाइ करित कि तुइ उइ का संसार ते उठाइ लेइ परइ कि तू उइका ऊ दुसट ते बचाइ राखउ। ¹⁶जइसइ हम संसार के नाइ, वइसइ वइ उ संसार के नाई। ¹⁷सांच के जरिए उइका पवित्र करउ तोर वचनु सांचइ सांच हइ। ¹⁸जइसन जंगल म तुई मोहिका भेजिस, वइसइ हमहू उइका जगत म भेजेन। ¹⁹अउर उइके खातिर हम अपन आपक पवित्र करित हइ जेहिते उइ उ सांच के जरिए पवित्र किएइ जाय।

कुल विसवासियन खातिर यीसु पराथना किहिन

²⁰हम केवल उनहु के खातिर विनती नाइ करित, पर उइ केर खातिर उ जउन इन केर वचन के जरिए,

मोहि पर बिसवासु करहइ कि वह सबइ याक होई। ²¹जइस तुइ हइ बापु मोहिमा हइ अउर हम तुइमा हन वइसइ वहू हमते होय, ई खातिर कि जगत परतीत करइ कि तुही मोहिका भेजिसि। ²²अउर उइ महिमा जउनु तुइ मोहिका दिहिस, हम उइका दीन हइ कि उइ वइसइ याक होइ जइसइ कि हम हई। ²³हम उइमा अउर तू मोहिमा कि उइ सिद्ध हु कइ याक होइ जाय अउर जगत जानइ कि तूही ने मोहिका भेजिसि अउर जइसइ तू मोहिते परेम राखिस वइसइ उइ तेउ परेम राखउ।

²⁴हे बाप हम चाहित हइ कि जउन तुइ मोहिका दिहिस हइ, जहां हम हन उहइ उइ हमार साथइ होई कि वह हमार ऊ महिमा क देखइ जउन तू मोहिका दिहिस हइ काहे ते तू जगत केर उत्पति के पहिलेइ मोहिते परेम राखउ।

²⁵हे धरम केर बाप संसार मोहिका नाई जानिस पर हम तोहिका जानिन अउर इनहुन जानिन कि तुहइ मोहिका भेजिस। ²⁶अउर हम तोहार नाम उइका बताएन अउर बतावइ रहिहउ कि जउन परेम तुइका मोहिते रहइ, उ उन्ह मा रहइ अउर हम उइमा रही।

यीसु केर बन्दी होय

18यीसु ई बातइ कहिकइ अपन चेलन केर साथइ कि द्रोण के नालेइ के पार गवा। उहां याक बारी रहइ, जेहिमा ऊ अउर उइके चेलउ गए।

²अउर उइका पकड़इ वाला यहूदउ ऊ जगह जानत रहत, काहे ते यीसु अपन चेलन केर साथइ उहां जावा करत रहइ। ³तबइ यहूदा पलटन केर अउर महायाजकन अउर फरीसियन की ओर ते प्यादन केर लइ कइ दियन अउर मसालन अउर हथियारन क लिएइ भए उहां आवा।

⁴तबइ यीसु उइ सबइ बातन केर जउन ऊ पइ आवइ वाली रहइ, जानि कई निकरा—अर उइते कहइ लाग केहिक दूढ़ति हऊ?

⁵उइ ऊ का जबाबु दिहिस यीसु नासरी केर यीसु उइते कहिस हमही हन, अउर उइका पकरइ वाला यहूदउ उइ केर साथइ टाढ़ रहइ। ⁶उइके ई कह तइ कि हम हन, वह पीछ केर हटि कइ भूमि पर गिरि पड़े।

⁷तबइ ऊ फिर उइते पूछिस, तुइ केहिका दूढ़ति हओ।

⁸वइ कहिन, यीसु नासरी केर यीसु जबाबु दिहिस, हम तउ तुइसे कहि चुकेन कि हम ही हन, अउर

हमका ढूँढत हउ तउ इनका जान देउ।⁹ई इह खातिर भवा कि ई बचनु पूर होय, जउन उइते कहिस रहइ कि जिनहका तुइ हमका दिहिस उइमा ते हम यकउ केर न खोएन।

¹⁰समौन पतरस तलवार केर, जउनु ऊ केर पासइ रहइ, खींचिस अउर महायाजक केर दास पर चलाइ कइ ऊ का दहिने कान का उड़ाइ दिहिस, उइ दास केर नाम भलसुख रहइ।

¹¹तबइ यीसु पतरस ते कहिन, अपन तलवर केर काठी म राखउ जउन कटोरा बाप मोहिक दिहिन हइ का हम उइका न पी?

यीसु महायाजक हन्ना केर सामने

¹²तबइ सिपाहिन अउर उइके सूबेदारन अउर यहूदियन केर प्यादन यीसु केर पकरि कइ बाधि लिहिन।¹³अउर पहिलेई ऊ का हन्ना केर पासइ लइ गये, काहे ते ऊ उइ बरस केर महायाजक काइफा केर ससुर रहइ।¹⁴ई उइका काइफा रहइ जेहि यहूदियन केर सलाह दिहिस रहइ कि हमार लोगन केर खातिर याक मनई केर मरबु अच्छा हइ।

पतरस केर पहिल बार इंकार

¹⁵समौन पतरस अउर याक अउर चलेउ यीसु केर पाछे हुइ लिहिस ऊ चेला महायाजक का जनइ पहचान रहइ अउर यीसु के साथइ महायाजक केर अंगनइ म गवा।¹⁶पर पतरस बाहरइ दुआर प खड़इ रहा, तबइ ऊ दूसर चेलन जउन महायाजक केर जाना पहिचानइ रहइ, बहिरइ निकरा अउर दुआर पालिन ते कहि कइ पतरसउ केर भीरइ लइ आवा।

¹⁷ऊ दासी जउन दुआरपालिन रहइ, पतरस ते कहिस, का तुहउ ई मनई के चेलन म ते हउ? ऊ कहिस हम नाई हन।

¹⁸दासइ अउर प्यादइ दंड केर कारन कोयलन केर धक्काइ केर खरइ तापि रहे रहइ अउर पतरस उइके साथइ खरइ तापि रहा रहइ।

यीसु केर सवाल जवाबु

¹⁹तबइ महायाजक यीसु ते उइके चेलन के बारे म अउर उ केर उपदेस केर बारे म पूछिसि।

²⁰यीसु उइका जवाबु दिहिस कि हम जगत खुलिकइ बातन केर किहेन हम सभन अउर आराधनालय ऊ मा जहां सबइ यहूदी इकठा हुआ करत रहइ सदा उपदेसु किहेन अउर गुपुत कछुउ नाइ कहेन।²¹तुइ मोहिते काहे पूछत हइ? सुनइ वालेन ते पूछउ कि हम

उइते का कहेन? देखउ वइ जानति हइ कि हम का का कहेन?

²²जबइ ऊ ई कहिस, तउ प्यान मते याक जउनु पासइ ठार रहइ, यीसु केर थप्पर मारि कइ कहिस का तूई मा याजकन केर ई परकार ते जवाबु देत हओ।

²³यीसु उइ का जवाबु दिहिन, अगर हम बुरा किहेन तउ ऊ बुराई प गवाई देउ, पर अगर भलइ कहेन तउ मोहिका काहे मारत हओ? ²⁴हन्ना उइ बंधे भये काइफा महायाजक केर पासइ भेजि दिहिस।

पतरस केर दूसर अउर तीसर इनकार

²⁵समौन पतरस ठार होके तापत रहा। तबइ उइ ऊते कहिन, का तुइउ ऊ के चेलन म ते हउ? ऊ इनकार करि कइ कहिस हम नाइ हन।

²⁶महायाजक म ते याक जउनु ऊ केर कुटुम्ब म ते रहइ जेहिक कान पतरस काटि डारिसि बोला का हम तुइका ऊ केर साथइ बारी म नाइ देखेत रहइ? ²⁷पतरस फिरउ इनकार करि गवा अउर तुरन्तई मुरग बाग दिहिस।

राजपाल पीलातुस केर सामने

²⁸अउर उइ यीसु का काइफा केर पासइ किले म लइ गये अउर भोर का समउ रहइ, पर उइ खुदइ किले केर भीतर नाइ गए जेहिते अमुध न होइ, पर फस क खइ सकइ।²⁹तबइ पीलातुस उइके पासइ बाहर क निकर आवा, अउर कहिस, तुइ ई मनई प की बात कि नाजिस करति हउ?

³⁰उइ ऊ का जवाबु दिहिन, कि अगर ऊ कुकर्मी न होति तउ हम उइका तेरे हाथइ नाइ सौंपित।

³¹पीलातुस उइते कहिस, तुई ई का लइ जाइ कइ अपन बेवस्था केर अनुसारइ ऊ का नियाउ करउ: यहूदियन ऊ ते कहिन, हमका अधिकार नाइ कि कउनउ क परान लेई।³²ई खातिर भवा कि यीसु क ऊ बात पूरिइ हुइ जाय जउन वहिते ई पता देति भए कहिसि रहइ, कि उइका मरबु कइस होई।

³³तबइ पीलातुस फिर किलेइ केर भीतरु गवा अर यीसु क बुलाइ कइ, ऊ ते पूछिसि का तू यहूदियन क राजा हइ?

³⁴यीसु उत्तर दिहिन, का तू ई बात क अपनइ ओर ते कहति हइ या अउरनउ हमार बारे म तुइते कहिन।

³⁵पीलातुस जवाबु दिहिस का हम यहूदी हन? तोरिइय जाति केर अउर महायाजकन तुइका हमरे हाथइ सौंपिन, तू का कहिस हई?

³⁶यीसु जबाबु दिहिन कि हमार राज ई जगत कानाइ, अगर हमार राज ई जगत का होति, तउ हमार सेवक लरते, कि हम यहूदियन केर हाथन म सौपा नाई जाइति पर अब हमार राज इहक नाई

³⁷पीलातुस ऊ ते कहिसि, तउ का तुइ राजा हइ, यीसु जबाबु दिहिन कि तू कहति हइ, काहे ते हम राजा हन, हम ई खातिर जनम लिहेन अउर ई खातिर जगत म आए न हइ कि सांचु प गवाही देई जउनउ कउनउ सांचु कहइ ऊ हमार सबद सुनति हइ।

³⁸पीलातुस ऊ ते कहिसि, सत्य का हइ? अउर ई कहि कइ ऊ फिरि यहूदियन केर पासइ निकरि गवा अउर उनहुन ते कहिसि, हम तउ ऊ मा कछु दोसु नाइ पाइति। ³⁹पर तोहार ई रीति हइ कि हम फसह म तोहरे खातिर एक मनई का छारि देइ तउ का तुइ चाहत हइ कि हम तोहरे खातिर यहूदियन केर राजा केर छाड़ि देई।

⁴⁰जबइ उई फिरि चिल्लाइ केर कहिनि, ई का नाई, पर हमार खातिर बरअब्बा केर छारि देउ अउर बरअब्बा डाकू रहइ।

यीसु कइहन सलीबी केर मौत

19ई पई पीलातुस यीसु केर लइ कइ कोड़े लगवाइसि। ²अउर सिपाहिन कांटन का मुकुट गूथि कइ ऊ केर सिर पर राखिन अर ऊ का बैगनी कपरा पहिनाइन। ³अउर ऊ केर पासइ आइ केर कहइ लाग, हे यहूदियन केर राजा, परनाम। अर उइकेर थप्परउ मरिन।

⁴तब पीलातुस बाहर निकरि कइ लोगन ते कहिसि देखउ, हम उइका तोहरे पासइ फिरि बाहर लाइति हइ जेहिते तुम जानउ कि हम कछुइ दोसु नाई पाइत। ⁵तबई यीसु कांटन केर मुकुट अउर बैगनी कपरन केर पहिरे भये बाहर निकरे अउर पीलातुस ऊ ते कहिनि देखउ ई मनई क।

⁶जबइ महायाजकन अउर प्यादन उइका देखिनि तउ चिल्लाइ केर कहिनि कि उइका सलीब प चढ़ाउ, सलीब प, पीलातुस उइते कहिसि, तुइ उइका लइकइ सलीब प चढ़ावउ, काहे ते हम उइ मा दोसु नाइ पाइत।

⁷यहूदियन ऊ का जबाबु दिहिन, कि हमरिउ बेवस्था हइ अउर ऊ बेवस्था केर अनुसारइ ऊ मारइ जाइ केर योगइ हइ काहे ते ऊ अपन आपके परमेसुर केर बेटवा बनाइस।

⁸जबइ पीलातुस ई बात क सुनिसि त अउरउ डरि गवा। ⁹अउर फिरि किलइ केर भीतरे गवा अउर यीसु

ते कहिसि तू कहां क हइ? पर यीसु उइते कुछउ जबाबु नाइ दिहिस। ¹⁰पीलातुस उइते कहिसि, मोहिते काहे नाइ बोलति? का तू नाइ जानत कि तुइका छोरि देइक अधिकारु हमका हइ अउर तुइका सलीब प चढ़ावइ केर मोहिका अधिकारउ हइ।

¹¹यीसु जबाबु दिहिसि कि अगर तुइका ऊपर ते न दिया जात, तउ हमार तुइ पर कछुइ अधिकारु नाइ होत। ई ते जउन मोहिका तोहार हाथन पकरिवाइसि हइ, ऊ का पापु अधिकइ हइ।

¹²ई ते पीलातुस ऊ का छोरि देइ चाहिसि पर यहूदियन चिल्लाइ चिल्लाइ कहिनि, अगर तू ईका छोरि देहउ तउ तोरिइ भक्ती कैसर को ओरइ नाई जउन कउनउ अपन आप केर राजा बतियाइति हइ ऊ कैसर क सामना करति हइ।

¹³ई बातन केर सुनिकइ पीलातुस यीसु केर बाहर लावा अउर ऊ ठउर याक चबूतरा रहइ जउन इबरानी म गब्बथा कहलावत हइ, अउर नियाउ केर आसन पर बइठा। ¹⁴ई फसह कि तयारी केर दिनु रहइ अउर छठवे घंटे केर लगभग रहइ, तबइ ऊ यहूदियन ते कहिसि, देखउ इहइ हइ तोहार राजा।

¹⁵यह वह चिल्लाइ लागे कि लइ जाउ, लइ जाउ, ऊ का सलीब पर चढ़ाई? महायाजकन जबाबु दिहिन कि कैसर को छोरिकइ हमार कउनउ राजा नाई।

¹⁶तबइ ऊ उइके हाथन सौपि दिहिन जेहिते ऊ सलीब पइ चढ़ि जाय।

यीसु कइहन सलीब दिन गवा

¹⁷तब उइ यीसु केर लइ गए अउर ऊ अपन सलीब उठाए भए उइ ठउर तलक बाहरइ गवा, जउन खोपड़ि केर ठउर कहावति हइ अउर इबरानी म गुल—गुता। ¹⁸उहइ उइ ऊ का अउर ऊ केर साथइ अउर उइ दुई मनईन केर सलीब पइ चढ़ाइन, याक केर इधर अउर याक केर उधर अउर बीच म यीसु क।

¹⁹अउर पीलातुस याक दोस पत्तर लिखिकइ सलीब प लगाइ दिहिस अउर ऊ मा यहू लिखा रहइ, यीसु नासरी यहूदियन केर राजा। ²⁰ई दोस पत्तर केर बहुतइ यहूदियन पढ़िनि, काहे ते ऊ ठउरू जहइ यीसु सलीब प चढ़ावा गवा रहइ नगर केर पासइ रहइ अउर पत्तर इबरानी अउर लतीनी अउर यूनानी म लिखा भवा रहइ। ²¹तब यहूदियन केर महायाजकन पीलातुस ते कहिन यहूदियन केर राजा मत लिखउ, पर ई कि उइ कहिसि हम यहूदियन केर राजा हन।

²²पीलातुस जबाबु दिहिसि कि हम जउन लिखि

दिहेन ऊ लिख दिहेन।

²³जबइ सिपाही यीसु केर सलीब प चढ़ाइ चुके तउ उइके कपरन केर लइके चीरिन अउर चार भाग किहिन हर सिपाही केर खातिर याक भाग अउर कुरतउ लिहिस पइ कुरता विनई सिया भवा ऊपरि ते नीचेइ तलक बुना भवा रहइ। ई खातिर उइ आपसइ कहिन, हमई का न फारी मुला ई पइ चिट्ठी डारी कि ऊ केहिका होई।

²⁴इवई खातिर भवा कि पवित्तर सास्तरउ कि बात पूरी होइ कि उइ हमार कपरन केर आपसइ म बाटि लेय अउर हमार कपरा पइ चिट्ठी डारइ वहु सिपाहिन एक इ किहिन।

²⁵पइ यीसु केर सलीब केर पासइ ऊ की महतारी केर बहिन मरियम क्लोपास की बीबी अउर मरियम मगदलीनी खरी रहइ। ²⁶यीसु अपनी महतारी अउर उइ चेले केर जेहिते ऊ परेम राखति रहइ पासइ खरेइ देखिकइ अपन महतारी ते कहिस, हे मेहरारू, देखउ, ई तोहार पुत्तर हइ। ²⁷तब ऊ चेले ते कहिस, ई तोहार महतारी हइ, अउर जइस भउ ऊ चेला, ऊ का अपन घर केर लइ गवा।

यीसु केर मिरतु

²⁸ई केर बादि यीसु ई जानिकइ कि अब सबइ हुइ चुका, ई खातिर कि पवित्तर सास्तर कि बात पूरी होई, कहिस, हम पियासे हन। ²⁹उहइ याक सिरके ते भरा भवा बरतन धरा रहइ, यहि ते उइ सिरके म भिगोये गए भए इस्पंज केर जूफे पइ रखि कइ ऊ केर मुंह म लगाइन। ³⁰जबइ यीसु उइ सिरका केर लिहिन, त कहिन, पूर भवा अउर सिर झुकाइ कइ परान निकारि दिहिन।

³¹अउर ई खातिर कि ऊ तयारी केर दिनु रहइ, यहूदियन पीलातुस ते विनती किहिन कि उइकी टांगइ तोरि दी जाय, अउर उइ उतरि जाय जेहिते सबत केर दिन ऊ सलीब प न रहइ काहे ते ऊ सबत केर दिनु बड़ा दिनु रहइ। ³²यहिते सिपाहिन आइ कइ पहिलेइ कि टांगन केर तोरिन ई केर बादि दुसरेन कि जउन ऊ केर साथइ सलीब पइ चढ़ाए गये रहइ। ³³पइ जबइ यीसु केर पासइ आइकइ देखिन कि ऊ मरि चुका हइ, तउ ऊ की टांगन क न तोरिन। ³⁴पइ सिपाहिन म ते याक बरछे ते उनका पंजरु बंधिसि अउर उइ मां ते तुरतइ लोहू अउर पानी निकसा। ³⁵जउन ई देखिस, उहइ गवाहिउ दिहिस अउर ऊ की गवाही सच्ची हइ, अउर ऊ जानति हइ कि सांचइ कहत हइ कि तुमउ बिसवासु करउं। ³⁶ई बातइ ई खातिर

भइ कि पवित्तर सास्तर की ई बात पूरी होई कि उइ की कउनउ हड्डी तोरी न जाई। ³⁷फिरि याक अउर पइ ई लिखा हइ, कि जेहिका उइ बेधिन हइ ऊ पइ निगाह करि हइ।

यीसु केर लास कइहन कबर मां रखा गवा

³⁸ई बातन केर बादइ अरमतियाह केर यूसुफ, जउन यीसु केर चेला रहइ डर ते ई बातन छिपाएइ राखत हइ। पीलातुस ते विनती किहिस कि हम यीसु केर लोथ केर लइ जाई, अउर पीलातुस उइ की विनती सुनिस, अउर उइ आइ कइ ऊ की लोथ केर लइ गवा। ³⁹निकुदेयुसउ जउन पहिले यीसु केर पासइ राति केर गवा रहइ पचास सेर केर करीब मिलइ भवा गन्धरस अउर एलवा लइ आवा। ⁴⁰तबइ उइ यीसु केर लोथ कइ लइकइ अउर यहूदियन केर गाड़इ कि रीति केर अनुसारइ उइ सुगन्ध केर सामान केर साथइ कफन म लपेटिसि। ⁴¹उइ जगह प, जहां यीसु सलीब पइ चढ़ावा गवा रहइ, याक बारी रहइ, अउर उइ बारी म याक नई कबर रहइ, जेहिमा कबरहू कोई न रखा गवा रहइ। ⁴²यहिते यहूदियन कि तयारी केर दिनु केर कारन, उइ यीसु केर वहिमा राखि दिहिन, काहे ते उ कबर निकटइ रहइ।

कबर खाली मिलत हये

20हफ्ता केर पहिलेइ दिनइ मरियम मगदलीनी भोरु केर अंधेरइ रहतइ कबर प आई, अउर पाथर केर हटइ भवा देखिस। ²तबइ ऊ दौड़ी, अउर समौन पतरस अउर उइ दुसरइ चेन केर पासइ जेहिते यीसु परेम राखत रहइ, आइ कइ कहिस, वइ परभु केर कबर मां ते निकार लइ गये हंइ, अउर हम नाई जानत कि ऊ का कहां राखि दिहिन हइ।

³तबइ पतरस अउर ऊ दूसर चेला निकर कइ कबर कि ओरइ चले। ⁴अउर दोनउ साथइ साथ दौरि रहे रहइ, पइ दूसर चेला पतरस ते आगेइ बढि कइ कबर प पहिलेइ पहुँचि गवा। ⁵अउर झुकि कइ कपरन केर परे देखिसि तउ ऊ भीतर न गवा। ⁶तबइ समौन पतरस उइ केर पीछेइ पीछे पहुँचि गवा अउर कबर केर भीतरइ गवा अउर कपरन केर परे देखिसि। ⁷अउर ऊ अंगोछइ केर जउन ऊ केर सिर ते बंधइ भवा रहइ, कपरन केर साथइ परा भवा नाई, बल्कि अलगइ एक ठउर लपेटा भवा देखिस। ⁸तबइ दूसर चेला जउन कबर प पहिलेइ पहुँचा रहइ भीतर केर गवा अउर देखिकइ बिसवासु किहिन। ⁹वइ तउ अबहिन तलक

पवित्र सास्तर कि उइ बातन केर नाई समझत रहइ; कि ऊ का मरे हुवन म ते जी उठइ केर होई।

मरियम मगदलीनी केर दरसन

¹⁰तबइ ई चेले अपन घर केर लौटि गए। ¹¹पइ मरियम रोवा भई कबर केर पासइ बहिरइ खरी रही अउर रोवत—रोवत कबर कि ओरइ झुकि कइ, ¹²दूइ सरग दूतन केर सफेद कपरे पहिने भए याक क सिरहने अउर दुसरे क पैताने बइठि देखिसि जहां यीसु की लोथ परी रहइ।

¹³उइ ऊते कहिन, हे मेहरारू, तू काहे रोवत हआ? ऊ उइते कहिस, उइ हमार परभु केर उठाइ लइ गए अउर हम नाई जानित कि उइका कहां राखिन हइ। ¹⁴ई कहिकइ ऊ पीछे फिरि अउर यीसु केर खड़ेइ देखिस अउर नाई पहिचानिसि कि ई यीसु हइ।

¹⁵यीसु उइते कहिन, मेहरारू, तू काहे रोवति हइ? कइका दूइति हइ? ऊ माली समझि कइ ऊ ते कहिसि, हे महाराज, अगर तू ऊ का उठाइ लिहिस हउ तउ मोहिते कहउ कि ऊ का कहां राखिस हइ अउर हम उइका लइ जाइब।

¹⁶यीसु उइते कहिन मरियम! उइक पीछेइ फिरि कइ ऊ ते इबरान म कहिन, रब्बूनी यानी हे गुरु।

¹⁷यीसु उइते कहिन, हमका छुवउ मत काहे ते हम अबहिन तलक बाप केर पासइ ऊपर नाई गयेन हइ। पइ हमार भाइन केर पासइ जाइकइ उइते कहि देउ कि हमार अपन बाप, अउर तोहार वाप अउर परमेसुर केर पासइ ऊपर केर जाइति हइ।

¹⁸मरियम मगदलीनी म जाइ कइ चेलन केर बताइसि कि हम परभु केर देखेन अउर ऊ मोहिते ई बातन केर कहिन।

यीसु चेलन केर परगट हुये

¹⁹वही दिन जउन हफ्ता केर पहिलु दिनु रहइ सांझ केर समउ जब उहां केर दरवाजे, जहां चेले रहइ, यहूदियन केर डर केर मारे बन्द रहइ, तबइ यीसु आवा अउर बीचइ म खरा होइ कइ ऊ ते कहिसि तुइ का सान्ती मिलइ। ²⁰अउर ई कहिकइ ऊ अपन हाथु अउर अपन पंजरु इका दिखाइस, तब चेले परभु केर देखि कइ खुस भए।

²¹यीसु फिरि उइते कहिन, तुइका सान्ती मिलइ, जइसइ बापु मोहिका भेजिन हइ, वइसइ हमहूँ तुइका भेजत हइ। ²²ई कहिकइ ऊ उइ पर फूकिस अउर उइते कहिन पवित्र आतमा लेउ। ²³जिन्ह केर पापन केर तु माफु करइ उइ माफु किए गये हइ जिनका तुम

राखउ, वइ राखइ गए हई।

यीसु थोमा केर दिखाय दिहिन

²⁴पर बारहउ म ते याक मनई थोमा, जउन दिदिमुस कहलावइ हइ जबइ यीसु आवा तउ उइके साथइ नाइ रहइ। ²⁵जबइ अउर चेले ऊ ते कहइ लाग कि हम परभु केर देखेन हइ, तबइ ऊ उइते कहिस, जबइ तलक हम ऊ केर हाथन म कौलन केर छेदन केर न देखि लेई, अउर कौलन केर छेदन म अपन अंगुली न डारि लेइ अउर ऊ केर पंजर अपन हाथु न डारि लेई, तब तलक हम परतीत नाई करबई।

²⁶आठ दिनन केर बादइ ऊ केर चेले फिरि घर केर भीतरइ रहइ अउर थोमा उइके साथइ रहा, अउर दुआर बंद रहइ, तबइ यीसु आइ कइ अउर बीचइ म खरे हुइ कइ कहिन, तोहिका सान्ती मिलइ। ²⁷तबइ ऊ थोमा ते कहिस, अपन अंगुलिक हिया लाइकइ हमार हाथ केर देखउ अउर अपन हाथु लाइ कइ हमरे पंजर म डारि अउर अबिसुवासी नाई बल्कि बिसवासी होउ।

²⁸ई सुनिकइ थोमा जबाबु दिहिस, हे हमार परभु हे हमार परमेसुर।

²⁹यीसु उइते कहिस, तुइ तउ मोहिका देखि कइ बिसवासु किएउ हइ, धन्य वइ हई जउन बिनु देखेइ बिसवासु किहिन।

³⁰यीसु अउरउ चीन्ह चेलन केर समूहे दिखाइनि जउन ई किताब म लिखेइ नाई गए हई। ³¹पइ वइ ई खातिर लिखे गए हई, कि तुम बिसवासु करउ कि यीसु इ परमेसुर केर पुत्र मसीह हइ, अउर बिसवासु करि कइ ऊ केर नाम ते जीवनु पावउ।

यीसु अउर एकु अनोखी घटना

21 ई बातनि केर बादइ यीसु अपन आपक तिविरयास झील केर किनारेइ चेलन पइ परगट किहिन अउर ई रीति ते परगट किहिन। ²समौन पतरस अउर थोमा जउन दिदिमुस कहलावति इ, अउर गलील केर काना नगर केर नतनएल अउर जबदी केर बेटवा, अउर उइकेर चेलन म ते दुइ अउर जेन इकट्टे भए। ³समौन पतरस उइते कहिस, हम मछरी पककरइक जाइत हइ। उइ ऊ ते कहिन हमहूँ तोहरे साथइ चलत हइ। तउनु तुइ निकर कइ नाव पइ चढ़े, पइ ऊ राति क कछुन पकरिनि।

⁴भोर होतइ यीसु किनारे प चढ़ि भवा तउ चेलन न पहिचानिसि कि ई यीसु हई।

⁵तबइ यीसु उइते कहिन, हे बालकउ तोहार पासइ

कछु खाइक हइ? उइ जवाबु दिहिन कि नाई।

⁶ऊ उइते कहिस, नाउ कि दहिनी ओर जालु डारउ, त पहिरेउ, तबइ उनहन जार केर डारिन, अउर अब मछरिन कि बहुताइत केर कारन उइका खींचिन सके।

⁷ई खातिर ऊ चेला जेहिते यीसु परेम राखत रहइ पतरस ते कहिस, ई तउ परभु हई। समौन पतरस ई सुनिकइ कि परभु हइ, कमर म अंगरखा कसि लिहिसि, काहे ते ऊ चेला जेहिते यीसु परेम राखत रहइ पतरस ते कहिस, ई तउ परभु हई। समौन पतरस ई सुनिकइ कि परभु हइ, कमर म अंगरखा कसि लिहिसि, काहे ते ऊ नंगा रहइ, अउर झील म कूदि परा। ⁸पइ अउर चेला डोगी प मछरिन ते भरा भवा जारु खींचति भए आए, काहे ते वइ, किनारे ते अधिकइ दूर नाई, कउनउ दुई सउ हाथ प रहई। ⁹जवइ किनारे प उतरे, तउ उनहन कोयले की आग अउर ऊ पइ मछरी राखि भई अउर रोटी देखिन।

¹⁰यीसु उइते कहिन, जउन मछरिन केर तुम अबहीं पकरसि हइ, उइमा ते कछु लाउ।

¹¹समौन पतरस डोगी प चढ़िकइ याक सौ तिरपन बडिय मछरी ते भरा भवा जारु किनारे खींचिनि अउर इतनी मछरी केर होइते ऊ जारु न फटा। ¹²यीसु उइते कहिन, कि आउ भोजनु करउ अउर चेलन म ते कउनउ हियाबु न भवा कि उइते पूछइ कि तू कउनु हइ? काहे ते जानति रहइ कि होय न होय ई परभु हइ। ¹³यीसु आवा, अउर रोटी लइकइ उइका दिहिन अउर वइसेइ मछरियउ। ¹⁴ई तीसरि बार हइ, कि यीसु मरे हुअन मते जी उठइ केर बाद चेलन क दरसन दिहिन।

पतरस केर फिर चुना गवा

¹⁵भोजनु करइ केर बादइ यीसु समौन पतरस ते कहिन, हे समौन यहुन्ना केर बेटवा का तू ई से बढिकइ मोहिते परेम राखति हइ? ऊ उइते कहिसि, हां परभु तू तउ जानत हऔ कि हम तोसे परेम राखत हई। ऊ उइते कहिसि हमार मेमनन का चराउ।

¹⁶ऊ फिरि दुसरिउ बार ऊते कहिसि, हे समौन

यहुन्ना केर बेटवा का तुइ मोहिते परेम राखति हइ? ऊ उइते कहिसि, हां परभु तुइ जानति हइ कि हम तुइते परीति राखति हइ, ऊ उइते कहिसि हमारि भेड़नि केर रखवाली करेउ।

¹⁷ऊ तिसरेउ बार ऊ केर कहिसि, हे समौन यहुन्ना केर बेटवा का तुइ मोहिते परीति राखति हइ, पतरस उदासु भवा कि ऊ उइते तिसरउ बार अइस कहिसि, का तुइ मोहिते परीति राखति हइ? अउर उइते कहिसि, हे परभु तुइ तउ सबइ कछु जानति हइ कि हम तुइते परीति राखति हइ। यीसु उइते कहिन हमार भेड़न क चराइ लाउ। ¹⁸हम तुइते सचइ सच कहति हइ, जबइ तुम जवान रहइ तउ अपनि कमर बांधि कइ जइहं चाहति रहइ, उहइ फिरति रहइ, पइ जब तुइ बूढ़ होई, तउ अपन हाथन केर लम्बेइ केर हइ अउर दूसर तोरिइ कमरु केर बांधिकइ जहइ तुइन चहिहउ उहइ तोहिका लइ जाई। ¹⁹ऊ ई बातन ते पता दिहिसि कि पतरसु कइसि मौतु ते परमेसुर कि महिमा करिहइ, अउर ई कहिहइ, ऊ कहिसि, हमार पाछेइ हुइ लैउ।

²⁰पतरस फिरि कइ चेले केर पाछे आवत देखिसि, जेहिते यीसु परेम राखति रहइ अउर जउन भोजनु केर समउ उइकी छाती की ओर झुकि कइ पूछिसि, हे परभु तोर पकड़इ वाला कउनु हइ? ²¹उइ का देखि कइ पतरस यीसु ते कहिसि हे परभु ई का हालु होई हइ?

²²यीसु उइते कहिन, अगर हम चाही कि वहु हमरे आवइ तलक ठहरइ रहइ, तउ तोहिका का? तुइ हमार पाछे हुई लेउ। ²³यहिते भाइन म ई बात फेलि गई कि ऊ चेला नाई मरिहई, तऊ यीसु उइते ई नाई कहिन, कि इव नाई मरि हइ। पइ यहु कि अगर हम चाही कि ई हमरे आवइ तलक रहइ, तउ तोहिका ई ते का?

²⁴ई वहइ चेला रहइ, जउन ई बातन की गवाही देतिहइ अउर जउन ई बातन क लिखिसि हइ, अउर हम जानति हइ कि उइकी गवाही सच्चिय हइ।

²⁵अउरउ बहुतइ काम हइ, जउन यीसु किएनि, पइ इ याकइ याक कइके लिखेइ जाति हइ, तउ हम समझिति हइ, कि किताबु जउन लिखिइ जाति, ऊ जगतउ म नहि समावत।